

曝書亭全集

冊五

曝書亭集卷第七十七

秀水 朱彝尊 錫鬯

墓誌銘 四

朝議大夫戶科給事中降補國子監學正趙君墓誌銘

君諱吉士字天羽一字恆夫姓趙氏世居徽州之休寧仕爲光祿寺丞諱廷賢者君曾祖考也贈昭武將軍諱完璧者祖考也封文林郎進階奉直大夫贈朝議大夫諱時腴者考也妣汪氏累封恭人贈淑人君入籍杭州補府學生順治八年舉浙江鄉貢進士康熙七年謁選知太原交城縣事縣居萬山中巖磴參錯孔河出塔莎谷東南流會于汾故水曰交水山曰交山縣曰交城地近屈產畜馬絕有力又饒灌木歲取其材以爲利君至日民間牧馬有禁上官廢南堡村木廠許沿河市賣由是利爲文水商民所奪交人重困往往去爲盜依山負固散則民聚則寇勢方張旁掠清源汾陽邢臺三縣君思翦除

之首閱武于郭南令下士卒進退有序捐萬錢犒焉還語賓從曰民  
可用也會年饑君錄餓者七十人完廨舍垣牆使家人與處詢羣盜  
出沒所在多得其實爰申明乘墉保甲團練之法君乃言曰凶歲良  
民易迫爲盜吾當撫之遂詣河北都行荒政諭山農毋爲盜所脅日  
暮留宿陶穴詰朝相度蹊徑通塞村砦近遠知最險者三坐崖東西  
兩葫蘆川繞其下塞葫蘆口則官軍不得進保三坐崖則官軍不克  
登君默識之而還十年十月朔總督檄縣進勦君行令山麓葺靜安  
堡期以月幾望官兵進屯先七日置酒城隅却月湖張樂于舫許老  
穉夾岸縱觀越宿復要崑山顧炎武華亭陸慶臻上海蔡湘翦燭賦  
詩密誠司夜者促更籌于子刻打五鼓君起送客出郭則守備姚順  
等已先受約統步騎兵四百集南關外矣疾行四十里饗士卒于水  
泉灘別爲三隊並進入兩葫蘆川據三坐崖賊鳥獸散散復合且戰  
且奔官軍分搜巢窟先後獲魁渠二十二人餘或降或自剄君別淑

憲召山農終始不作賊者三十七家賚以羊酒其素不當夫徭者千  
四百二十家編其籍入都圖入山旬有六日交山之寇悉平君治交  
五載餘修圖經新橫舍立倉廩定軍營折疑獄罰贖醵使種柳鑿山  
通龍門渠漑田十萬四千頃又力請上官復南堡村木廠秣善馬于  
驛士飽馬肥用降賊攻賊故能成功巡撫上其狀徵入爲戶部山西  
司主事居母憂還籍服除補戶部河南司主事載丁父憂起復補戶  
部四川司主事十四年覃恩由文林郎進奉直大夫二十年奉使徵  
揚州關鈔君寬以惠商負販乘舫艫出入者暨免譏察輸稅者俾自  
封投櫝中胥吏苛斂之弊盡革復命監督通州中南倉旋入會典  
館奉勅排纂鹽漕二書二十三年 誥授朝議大夫明年戶部尙書  
科爾坤上言賦役徵解條目太煩請更造簡明全書天子允其請開  
局山西司君充纂修官時總裁光祿寺卿龔佳育持議謂州縣催科  
歲發由單分壤地之則使民知輸納之數法至善也惟因畿輔撥補



地畝歲有更易而江浙稅課起運存留條目繁瑣近例有司必合計州縣之田刊入由單尾數稍有不符動行駁改名爲易知在百姓實難知請米數止升合勺銀數止分厘毫自秒撮絲忽以下悉刪除之而升秒爲合升絲爲毫斯勘算易明賦額仍無虧損乃更定由單式未定而佳育卒計部在官人胥動浮言以畸零數不可除古未有議刪去者朝士多惑其說於是給事中楊周憲特疏請勿更

天子下公卿議君作論一篇援唐元稹當州所上狀中云斛止于合錢成于文在百姓納數元無所加于官司簿書永絕姦詐是則昔人已昌言之且米有圭粟粒黍銀有微塵纖沙入之權量莫辨其形鏤諸梨棗徒繁其目況會計凡析一爲三者悉數之不能終窮佳育議是事雖不果行盈庭莫能難也又明年

天子需爭臣試三十三人于保和殿擢君戶科給事中君上言會典與紅本相表裏故事內外章奏付內閣典籍廳儲藏歲久無隙地

因貯科房往往散佚又各部司簿錄有第載國書未譯漢文者除二十  
十五年前已經纂輯外宜滿漢對譯彙送內閣以爲異日續修地  
天子允行旣而銜命勘河還臺班有與君忤者劾君父子各占籍  
以仕吏議落職久之補國子監學正君好學善與人交夙有知人之  
鑒分校山西鄉闈拔馮給事雲驢又賞識錢府尹晉錫汪編修灝于  
未遇時每當賦詩酬和衮衮不休疊一韻至萬首所居寄園考定爲  
月張園故址濬池累石分布亭館種花木海內名士入都恆留連不  
忍去君脫略禮數過者不知何者是客也所著書有續表忠紀寄園  
寄所寄錄音韻正譌徽州府文城縣志詩稿尤多俱鏤版行世若交  
山平寇本末則其友吳興夏駟紀其事爲一書君年七十有九終于  
京師卒之歲康熙四十五年二月朏也娶汪氏誥封恭人子三人  
道歆貢生候選儒學教諭景從山東布政司參議分守濟寧道景行  
康熙丁卯舉人內閣辦事中書舍人女一人嫁國子監生戴嘉猷孫

男一十二人繼掄歲貢生繼扞康熙己卯舉人畢元附學生抗繼撰  
國子監生餘幼未注士籍女九人曾孫四人君之歸喪也景從先卒  
景行卜地于某原葬有期矣來請銘嗚呼君才傑也宰百里之邑積  
年未靖之寇犯虎狼之穴剗除之其智勇有不可及者而又詳于政  
典使久居諫垣言天下事閭閻惻惻何必不如古人乃以微罪去位  
一官左謫徒令仰屋梁著書以老不亦可惜也夫且徽州士族多流  
寓四方寄籍取科第卽如先儒朱子本婺源人而紹興十八年同年  
小錄注籍建州建陽縣羣玉鄉三桂里彼夫城陽旻橫四子旻守墳  
墓吞居徐州桂居幽州快居華陽前史不以爲非由是推之君之父  
子似乎可道吏議也已銘曰

宰山城枹鼓鳴探赤丸吏不驚去劇賊枹鼓息陟考堂譽超特入諫  
垣進讜言嗟青蠅止于樊官雖左賓滿坐人裸裎焉挽我酒百船詩  
萬篇留述作通都傳伊人逝孰譚藝音徽亡哀輓繼筮兆基作銘詩

訂君實無諛辭

鄉貢進士魏君墓誌銘

君諱坤字禹平別字水村世居嘉興之魏塘今之嘉善縣也曾祖考某祖考某考某雖不仕鄉黨稱善人從祖吏科都給事中大中忤奄寺受蒙蔽刑死詔獄世父學淨以哀毀卒苦次故言忠孝門者首魏氏君十齡草今文弱冠兼攻古文詩詞家有田二十畝不足供饘粥父喪除游京師入太學京師貴人延君授經教其子既而客中吳與嘉定陸徵君元輔海寧陸處士嘉淑訂忘年之款詩詞日益工尋就試橋門撰石鼓賦國子師交賞擊以爲絕倫也屢試有司不利乃託迹賓幕東游歷下謁孔林南入楚粵西浮彭蠡淹豫章年五十有四始舉鄉貢進士兩與計吏偕赴禮部仍下第歲乙酉復書驢券北上以歲除前一日抵真定之南關寒甚擁爐捉酒乍飲三爵聞一嗽而君逝矣太守寶應劉君中柱君之故人也哭君子簣下質明視其斂

含載以輜車歸其喪于是君之子錫琦錫璉將葬君于遷善鄉之東  
蚤圩凶服來請銘嗚呼君之學叩之而不窮其修辭動中事會所填  
樂章被歌管悉合于律宜其有浙西才士之目舉于鄉謂晚且達矣  
乃反速之死于道路天乎人乎若其持己正臨財廉非其道一介不  
以入懷非其人近乎膩而不污可謂有君子之守也已君生于某年  
月日卒于某年月日享年六十先娶陳氏繼娶王氏有子二人孫男  
四人女二人所著有倚晴閣詩鈔秦淮雜詠歷山唱酬集粵游記程  
詩水村琴趣多行于世銘曰  
魂兮歸來北方不可以久留些反葬于鄉樂哉斯丘些將詩可傳抑  
又何求些

歲貢生程君墓誌銘

歙縣程君諱浚字葛人一字肅菴通經史百家之言寄籍杭州補仁  
和縣學官弟子屢試不利以歲貢入國子監居歙之岑山山形鐵峻

特立新安江中爲一鄉屏障君董工治樓榭繚以垣牆守望相助草  
竊莫敢窺又新宗祠以睦婣合族姓通其有無少出嗣世父晨餐夕  
膳事二人盡歡且眷戀所生終身孺慕親亡以兩房考妣合葬于一  
塋築丙舍墓旁歲時臚臘禮拜上食如生存榜曰侍初堂友愛昆弟  
無間言交友重然諾不因燥濕輕重能爲人釋紛嘗陳亭戶疾苦于  
至尊前顏色不少懼里居逢寇警率鄉勇防禦寇退官軍牧馬于郊  
村民供芻茭不繼君言于主帥旋師客安吉茶陵兵變有司苦無備  
君從容代爲區畫上官允其議城得全君歸理家務然不廢學兩淮  
都運司志自徐鵬舉朱廷立後續者無人君分門編輯頗挈其要暇  
輒治方藥療有疾者所活甚多以是閭閻無貴賤咸稱君善人君以  
明崇禎十一年十一月日生卒于康熙四十三年十月日享年六十  
有七曾祖某祖某考某本生考某均不仕娶吳氏子四人長喈中康  
熙己丑進士次啓次哲俱候選州同知次鳴國子監生女一人嫁國



子監生汪琮孫男八人女六人君既卒歎諸生百二十有七人合辭請以君入鄉賢祠下上之論交孚乃設粟主送入祠將葬君之季子鳴請予銘其墓銘曰

不以爲人後而孝衰于親不以身不仕而善諉諸人庸言諄諄庸德循循祀馨宗兮饗序卜吉壤兮桑津若稽古昔庶追蹤于叔度元考之倫也乎

嘉定張君墓誌銘

嘉定張雲章既合葬考妣于先世之兆率諸弟乞秀水朱彝尊銘其藏雲章才士也以貧游京師適貴人館願得生稱弟子不應歸謁節使思強其在門終不應也以是屢試有司不利歸愈貧然其守己益嚴義利之辨動以古人爲師自事親而外孝養祖考妣盡子職蓋張氏世以孝友聞由來遠矣志之曰君諱履素字子旦一字雯來七齡喪母父禔授以四子書通一經工楷書弱冠補縣學生奉繼母如母

友愛諸弟田產僮僕恆推與之娶李孺人武英殿中書舍人允新之  
女爛壺行君喜得內助晨羞夕膳克承二人歡魚菽之祭歲時以禮  
舍人嘗以珠二索計百顆遺君大者重一銖君初不審視孺人亦不  
以耀首也會君坐奏銷逋賦尾數未輸除名悒鬱不自得年四十四  
病卒孺人教諸子力學躬治紡車脩祀事逾謹曰祭大事吾冢婦也  
其可忽諸賓客至必供雞黍舍人珠旣封完屢空閭以內無交謫語  
雲章生時孺人夢大星墜于懷占者曰後必顯久而名不登仕籍孺  
人安之曰命也君沒後孺人力持門戶四十餘年以康熙四十六年  
月日終孺人有子五雲章雲蔚國子監生雲從雲揚縣學生雲縉業  
儒女子一贈孺人壻內閣中書舍人朱文龍孫男一十六人女八人  
曾孫女三人銘曰

凡民喪度丘隧墓大夫正其位張南渡徙姑胥稱萬戶江橋居依仁  
鄉橫港里祖居中昭考妣卜習吉筮協從銘貞石埋桑東

歲貢生潘君墓誌銘

鄉貢進士烏程潘麟舍舟謁予蹲賓橋畔請銘厥考之墓問其門世居縣之匯沮里高祖可賢奉政大夫知合州事與兄太子少保工部尙書季馴同舉于鄉者也曾祖某祖某考某均不仕問其出處少補學官弟子晚充歲貢生職當授儒學訓導未銓問其年生崇禎七年月日卒于康熙四十三年月日問其撰述何書則有易解春秋傳考家禮小學外篇天文星野辨方輿曆法錢法鹽法備荒法諸書律呂志河渠考花月田家曆東齋隨筆又以儀禮經傳通解經朱子草創未成足本思取先後鄭氏孔氏賈氏王氏衛氏敖氏諸家會粹爲五禮條目繁重一手未果論定也富哉立言矣乎今士習日下由山長旣廢司教者罕得其人栗栗少年目不識九千字擁臯比秉木鐸師嚴道尊之謂何惜也君之學術經六藝緯三才未沾一命以樂育多士天實爲之嗚呼悲夫君之學一主乎敬行事必告祠墓與朋友交

長筵廣席衆或謹叟侍者見其以手畫膝作敬字人或負己無愠容  
施于人無德色言必踐善必躬行嘗論學于家其子問朱陸異同優  
劣君曰學者宜收拾身心慎勿道聽塗說業日修得失自見先儒優  
劣辨之不差毫釐與我何涉邪其于門弟子請業亦未嘗高談性命  
也君年十二開剃令下髮落輒以尺紙裹之齒牙爪甲謹藏之笥沒  
入周身之具生平敦睦同氣善難悉書蓋潛德勿耀幽宅不可無銘  
者已銘曰

君之居在蒼霄字東暘諱開甲讀父書通六經曲臺禮尤研精不矜  
名不嗜利孝于親友昆弟廣述作何紛紛去者疵歸乎醇銘君藏列  
其目俾名山得著錄君四子長曰麟叔也天仲季存君善人宜有後  
勒吾文表耆舊

徐州蕭縣儒學訓導樂君墓誌銘

維揚有嶽奇磊落之士樂君諱又令字允諧一字介冰少能文學使

者試童子拔置府學名第一其爲人孝弟廣交友輕貨財闢菹圃京江中焦山障其下芰荷葭菼浦樹圍之數重有橘獨立結實青黃足當洞庭百頭暇招番禺屈大均賦詩宛平韓昌援琴鼓羽化之曲陶然樂其志也旣而海踪深入戰後廢爲牧馬之場乃移居江都郭東八十里築洗心亭雜樹花柳比于故園風景略似乃講神仙服食之法成都費密爲作記君嘗一至京師以歲貢生入國子監選人按籍除君徐州蕭縣儒學訓導而君堅不赴也居家遂潔白之養父喪廬墓三年因徧覽青紫囊書兆基考宅家祭立宗子主之通族墳墓咸爲修治戚懿貧不能昏喪者必資以私錢胸無水旱燥濕鄉鄰鬪者以片言釋其爭蓋君之爲善不倦如此君以明崇禎十年月日生康熙四十五年月日卒享年七十配杜孺人子十人男四人長經內閣中書舍人先君卒次緯江都縣學生次統候選儒學教諭次大維揚州府學生女六人一適江都縣學生蔣旻一適揚州府學生陳琴一

適國子監生高鼎蔚一適候選儒學訓導湯有斌一適江都杜德馨  
一適歲貢生郭元銳孫男十一人長宮聲揚州府學生承重服三年  
喪者也女九人曾孫男二人君晚自號悟賓道人擇地于攝山戴家  
庫題曰悟賓歸宿處戊子正月既望井椁葬焉銘曰

舍儒官師老氏吁嗟樂君葬于此

文學鄭君墳誌銘

君諱珙字原道更字隨始姓鄭氏世居嘉興縣梅會里里故無巨室  
數門才者曰西毛東鄭鄭氏有鄉貢進士知興國縣事諱士奇者君  
之世父也曾祖某祖某父某三世均不求仕君少治春秋既而嫉胡  
安國傳義之非投牒更治詩家無田產授生徒自給所居破屋三間  
垣牆不蔽井闌竈觚紡輒畢聚一室客至呼主人闔門而與之語率  
以爲常每文會賦詩君堅坐不作間擬樂府音節出入漢晉間一及  
諸經疑義講說紛綸闡前賢所未發以是問業者漸多束脩之入積



累十金或勸君營什一之利君乃畀里人褚已浮舟于泖販吉貝花中塗爲盜所劫已還語君異日必償君曰盜劫子吾責子償是吾亦盜也子勿復言鄰有曹甲貸君白金二鎰賣藥于肆以甘旨養其親終歲子母不納或諷君收其藥肆君曰甲藉是養其親匪利我財共子職也封其肆是奪之食傷孝子之心吾弗爲也由是人皆曰君長者貴人延君訓其子推大宅舍之居數月語人曰葦門圭竇吾素安之此非吾寢處地竟辭歸久之家益貧冬無衣脚或不韞然終不以告人年七十有五以疾終娶崔氏先卒子三人孫五人貧不克葬族人謀率私錢瘞君乃書君言行納諸壙系之銘曰

子非墨氏之徒而葬之薄也猶勝保而委諸壑也嗚呼斯命矣夫

曝書亭集卷第七十八

秀水 朱彝尊 錫鬯

墓誌銘<sub>五</sub>

中憲大夫知思州府事陸公墓誌銘

去平湖縣治東六里五行涇有丘隆然爲故中憲大夫知思州府事陸公之墓公諱世楷字英一別字孝山曾祖考長庚中萬曆八年進士累官南京通政司使進兵部右侍郎祖考啓麟國子監生以孫萊貴贈通議大夫內閣學士兼禮部侍郎考濬睿宣府推官始封內弘文院中書舍人累贈通議大夫內閣學士兼禮部侍郎妣譚氏山東布政司參政贈太僕寺卿昌言之女累贈淑人公少補學官弟子有文譽順治五年以選貢生赴吏部除平陽府通判又四年同知登州府又六年遷知南雄府事後十九年丁父憂服除補思州知府蓋先後視府事二十四年未得遷告歸四年卒卒時年六十有五公之判

平陽也甫至而姜瓖搆亂遠近蠶起應之平陽被圍守以下局縮不能畫一策公貸粟于富民籍其丁壯登陴固守百日而圍解旋誘降其魁渠釋其黨師後大饑人相食公爲粥食餓夫馬周于郊市辨民色先後給之餓者全活其在登州海寇揚帆猝至將逼城下公立設守具率舟師禦之寇乃逸去時叛帥海時行剽刺州縣僭稱王以公知兵事戒勿犯境又登有嫠婦夜爲盜所殺鄰里訐其媳有所私慮事露殺姑滅口公攝縣事察其寃求殺人者不得禱于城隍神神夢一馬騰蹕不休晨徧呼死者咸懿嫠婦有姊子爲驛卒公疑焉訊之卒言殺人夜投牒入府公念投牒時日有文簿可稽取驗之字屬改竄卒乃引服蓋卒初意行竊方入門嫠婦突出猝加刃焉媳實不知也南雄嶺嶠門戶疆理初定平南靖南兩藩王並駐廣州羽檄不絕于道部將更替出嶺一日箠死七人公馳見帥論軍士罪有戴孔雀翎者二人入始興山自稱平藩侍衛發民鑿礦民盡恐公往詰曰王

雖尊不得擅役吾民今不使太守知詐也遂縛二人送廣州王不敢  
問黠僧與平藩暱結精廬府郭外誘婦女入鎖其夫後圃而淫其妻  
閉置者十餘公詢知之僧故拳勇手一梃百夫莫敢近乃詭言營齋  
延之至入門門焉者棖闔及堂階則胥隸畢集縛之以前僧瞋目呼  
無罪公先時已別遣捕卒盡執僧廬所藏婦女至庭下僧辭窮公斃  
之杖下邦人皆以爲快嶺南俗好訟公曲喻以理赴愬者漸息暇築  
天峯書院課諸生溫鏐王澐等講學買田以饒之去之日老穉拒輪  
遮馬不得行立祠府治東士民春秋社祭其莅思州值 王師凱旋  
軍馬繇繹府舊設平溪清浪二衛後劃歸湖廣而站夫猶循例派協  
公請于上官得免繼遭旱禔斗米二千錢吏請開徵秋稅公不可民  
德之輸者過半前守以增賦得遷公覆丈以弓無餘壤請反其舊又  
持議謂思州雖列爲府所屬止四土司居民附郭不滿百家丁糧不  
及一小縣而又商旅不通營伍不設供億難與他府齊宜仿黔西平

遠近制降爲州隸之鎮遠而以施溪一土司割附銅仁可救一方之困議未允公乃以病引歸矣公孝事父母友愛諸弟篤友誼能通財不以生死爲厚薄家無美田宅遇人有緩急必應未嘗責報歸田後足跡不詣公府有司行鄉飲酒禮請公爲賓辭者三然後赴晚結方外社與禪人通復今釋縱譚清淨理通復工于詩今釋者前進士仁和金堡也公守南雄日爲治丹霞精舍以居公歸後舍之于東園遂終老焉公于詩歸風合雅不墮叫囂之習文格醇正手輯南雄思州二志事必徵信集若干卷存于家公生某年月日卒于某年月日配張恭人生某年月日卒于某年月日合葬于墓子男八人咸有文行一嗣仲父某也女五人俱嫁士族孫男九人女二人銘曰

嗚呼古之循吏久于其官政以不煩民以不寃公于黔于粵除惡必先濟之用寬客至張旛廬旅居船士也討論席研壺餐志其山川申畫土田有德有言溢于炎塵宜爾子孫克昌厥文美哉鮮原秀木丸

丸罔有後囂

許封君墓誌銘

晨有造吾門剡啄者童子以告眎其刺則給事中山陽許君也延之入布衣管屨請以弟子禮見主人固辭稽顙而後言曰志進不幸連遭父母之喪鮮民之生分不如死茲日月有期將葬惟先生之文無諛辭庶取信後世敢請銘按狀公諱某字信孚其先自吳徙于淮世居山陽縣之東村曾祖歲貢生某祖鄉飲賓某考督師參佐某公讀書通大義不就試居父喪自初終及葬一準于禮母病視藥餌惟謹祭必致齋家法嚴肅不飲酒不圍棋無嬉戲之具教諸子以義方少不當意輒施夏楚性質直負氣不肯下人恆慷慨自許曰人生不行萬里豪氣何由得伸乃南浮江漢北走燕齊西逾河洛歸治菹圃將老焉旣而就給事君鐵嶺官舍因東涉遼海視其子行取入京師補戶部主事改授兵科給事中旋掌禮科給事中印加五級公初授封



文林郎進封朝議大夫配周氏慈惠有壺儀初封孺人進封恭人子  
男三長給事君志進也次某次某俱國子監生女三俱配士族孫男  
三女五尚幼公及恭人之還里也給事君方擬奉潔白之養而恭人  
以康熙四十四年五月先卒公旋以四十五年正月病終宜給事君  
之擗踊號泣深以不幸自傷也以予論之士惟貧賤得顧父母之養  
然無升斗之祿糠粃不飽雖欲啜菽飲水盡其歡難矣若一登仕籍  
官守言責拘繫不得自由聞親喪逾時奔者有焉不得奔者有焉彼  
夫墨衰經以治兵奪情而秉國政豈其初心不作孝哉殆亦時勢迫  
之貪位之念既萌立身一敗遂不可以爲人子今給事君以言去國  
眷戀庭闈朝餐夕膳病奉藥裹喪視斂含凡附于身周于棺槨者無  
不致其誠信勿之有悔焉而且吏不呼其門朝不釋其服孝子慎終  
之禮斯可勿憾毋亦不幸之幸也與銘曰

淮之水漉漉得地而流有崇者丘是爲太岳之裔給事中之考妣合

葬于是幸哉有子

知交城縣事靳君墓誌銘

君諱治青字東表先世自歷城徙遼陽曾祖某贈光祿寺 祖某贈  
通政 考弼通議大夫兵部職方司郎中君其第三子也年十三喪  
父習舉子業服除試不售補筆帖式以贍敏稱出知太原府交城縣  
事交故巖邑號難治君至興教化勤撫綏開誠布惠民乃胥悅歲乙  
亥平陽地震人死者萬計君奉調勘災掩骼賑飢殫竭心力會禁旅  
北征道出雲朔奉軍符協辦糧草鄰縣率多浮派君獨斟量緩急極  
意節省民無重困又踰沙漠送戰馬至大青山不敢告勞無何郡檄  
下督責文書過當君素寬和及是忿甚因得心疾不復出廳事然庶  
務能舉大綱無闕冗者閱三年乃請歸歸六年遭母崔淑人喪疾益  
甚又踰年遂卒子昔游太原嘗一至交城矣緹馬城隅登萬卦山日  
暮風雨作遂留宿僧舍夜聞擊柝雜魚板聲山僧竟夕不寐晨起鋪

眉苦眼有憂色詢之山去縣西北五里逼寇穴窟穴其徒慮驚客也  
其後錢唐趙君吉士宰是縣請于上官調兵勦平之然遺種尙未盡  
及君爲政幾于臥理而在交九年邑無桴鼓之警民樂其業以是信  
君之才爲不可及已君嘗依其兄養疴官舍暇探四明三衢山水之  
勝間賦近體詩小詞清疎秀逸頗入作者家數惜乎短折未克升堂  
入室也君生于康熙己酉十月二十五日歿于乙酉十一月三日妻  
孺人李氏故安徽巡撫都御史諱鋤之女柔順有婦道生康熙丁未  
六月二十六日歿于乙酉十月十三日子寶齡尙幼經紀君之喪而  
合葬君夫婦于某原者君之仲兄寧波府同知治荆也銘曰  
一朝之忿疾不可醫胡才人之不達而命止于斯吾銘幽宅太息齋  
咨矧伊兄弟奚其不悲

儒學訓導倪君墓誌銘

同里倪君識之四十年君時授徒城東竹亭橋卽其人恂恂有君子

之容觀其文悉本經義君早見知于有司九試場屋不利年四十八以歲貢入國子監諸城李侍讀澄中讀其廷試卷亟薦之榜發以儒學訓導待銓是秋赴順天鄉試復不遇君乃焚所作詩文就予宣南坊邸舍講經義學爲古文辭其說經不專主宋儒謂易有君子之道四不當專主爲卜筮之書又謂尙書古文可疑武成紀日與召誥顧命異益可疑又謂孔子說詩蔽以一言曰思無邪淫奔者豈暇作詩而孔子取之當依小序爲是又謂大小戴同授禮不當偏廢大戴氏宜去月令存夏小正去明堂位存明堂投壺則參用之又謂說春秋者紛綸皆害于義孫復胡安國刻深尤甚又謂羣經縱有錯簡宜仍其舊宋元諸儒多逞臆見更易未免侮聖人之言其持論頗與予合因留不去取韓嬰鄭康成以下詩說五十家折衷而抄撮之旣而予移家具寓宣北坊轉徙斜街花市君授經宣武門內弟子著錄者日衆乃避跡西山君精于易卜斷卦奇中又善青黃紫囊之術撥沙

發水偶爲主人相度聞者造請曰繁君曰吾術期避禍爾諸公欲以化者要福不可得也先是有例選人入貲者得先除君念親老思謀三簠以養束脩之入悉輸之官名當注除日矣或紊其籍歷數歲名反居後遂引歸歸事其父飯糲焚枯怡然樂也逾年痛其弟天無子遂成痼疾歲在丙子筮之得乾之同人曰此六月之卦也吾其以是月終乎壬辰昞果卒年六十有一君諱我端字郢客初名野王字古期先世嘉靖中自紹興避倭亂徙嘉興曾祖文遇國子監生仕爲廉州府經歷祖某早卒祖母胡持苦節授君毛詩孝經者也父某不仕母張氏妻吳氏子二人仁存國子監生鳳啣海鹽儒學生女一人壻國子監生沈某孫一人女孫一人君事祖母父母孝友于諸弟無間言又急人之難故人有孤不負其託平居義命自安客或憫其不遇秋試以關節進拒不受又臨財廉口不言利婦翁念其貧贈以負郭田六十畝君固辭翁沒亟還外家券人有所負不責償其人內媿久

而獨完其逋或以計中君君亦未嘗宿怨其學以正心術爲本博通經史尤邃于詩稟雖未就言詩者莫有過焉間與浮屠道士還往然臨終誠其子不得作佛事其持正若是嗚呼今之爲校官者許以貲進黃口白面後生日未覩九經之文擁臯比自詡師表者不可悉數以君之學俾登講席庶幾合乎古之書院山長足爲士子圭臬而卒不得試所長老于逢掖死不亦可惜也夫于其葬宜有銘銘曰譬彼積薪先者後之孰是人斯不試其才天乎祝予予寧不悲

文林郎知舒城縣事朱君墓誌銘

里有同進士出身知廬州舒城縣事朱君諱振字嗣宣一字千仞所居州東灣在清香樓左蓋府治卽秀州治故名君孝父母友愛諸弟睦族人以兄事予其論學以主敬爲本文尙體要去枝葉歲乙卯受知崑山徐公秉義舉鄉試第二人己未試禮部釋褐于太學丁卯籤除今官戊辰冬十月 覃恩授文林郎壬申六月卒于官舒城自崇



積壬午遭寇亂井邑丘墟入

皇朝雖加意安集然居民多鴈戶遇歲凶輟耕而走催科不前又路處劇驂送迎官長鮮暇日俗好鬪士多廢學君至首葺明倫堂月課士子以經書義均賦稅清保甲勸農桑息爭訟凡害于民者次第去之莅官之明年武昌兵變王師有征由舒入楚民大恐市肆皆閉君曰師行糧食絕其食是導之掠也令大開縣門悉民間市肆所有物徙置兩廡君立堂下俾胥史與隸操斤權具斗斛束芻茭洗盆甕君平物價而鬻之兵兵獲醉飽歌舞而去先是上官欲調江寧兵戍英霍府檄下俾封桃溪運米船以載典史請任其役君曰無庸舒非必由之道也既而府檄復下令釋所封船人乃服君善料事縣多槁壤水利久廢不治舊有七門三堰十塘漢韻羹侯信始造至魏揚州刺史劉馥修復之溉田二萬畝迄于明知縣事范得民劉顯更事修築民共其利後爲勢家曲防遏之使不下君循覽故蹟毅然以疏濬

爲己任諏日鳩工畚鍤聿興克復其舊舒民布穀既獲赤白相雜計部以所輸米色不純行令赤白分貯山農苦于分揀君力請漕督援河南事例免分貯其言曰身爲親民之吏而民隱不知罪已不勝誅矣若知而隱忍是視一己之功名爲重而萬民之怨讟爲輕義之所不敢出也漕督嘉其強項允咨計部焉君治舒五年盡心民事不遑暇日以勞邁疾終于官舍囊無長物舒人祀之名宦祠且率私錢設祭道左執紼泣下者千人旣歸喪以康熙四十二年十月葬于嘉興縣北辰字圩祖塋之左於是鄉之父老子弟謂君循吏宜配食鄉賢之列衆皆曰可有司得請乃造粟主送巖宮君之曾祖某祖某俱不仕父某敕封文林郎舉鄉飲大賓年九十而卒母張氏贈孺人繼母及氏封孺人妻凌氏亦封孺人子三德溥嘉興縣學生修永益求俱國子監生女二一嫁王上舍藩一嫁吳上舍瓚孫男二人尙本向東女二人嗚呼今之號稱能吏者吸民膏髓以善事上官得拔擢入臺

省部曹比比也若君之宰邑目不知有上官第以勤民爲先務或惜君脆促未盡其才然使再假之年彊直自遂難乎免于上官所劾是則君年之不永獲全其名未可謂君之不幸也已曩者君謁選人于京師就予舍館相與論古今得失聞予一善言喜動于色有過未嘗不相規也蓋知君之詳者莫予若德溥兄弟請誌君墓遂不復辭銘曰

悅以使民民功曰庸胡不報最而遽凶終邑有俎豆里配警宗君可勿撼反葬家江

文學管君墓誌銘

管氏之望出太原又出彭城其自陝西三原遷于宣州則宋靖康間諱某始也自宣城遷懷寧則明洪武初諱某始也君諱某曾祖曰某有隱德祖某嘉靖癸酉舉人知金谿縣事考某縣學生員君年十八補學官弟子以文試有司輒置高等名藉甚于時貴池吳應箕次尾

宣城咎質無疑交譽君延之入復社復社者東南知名士相結持清  
議拒閹人黨與東林卿大夫聲氣相附和者也應箕實爲倫魁君辭  
不可謂必有鉤黨之禍未幾果然福王南渡馬士英阮大鍼柄用濫  
以名器假人江東諺曰職方賤如狗都督滿街走而大鍼之母君之  
姑也一日君往省焉大鍼留之邸謂曰弟欲官乎君不應曰道匪遠  
也池州太平需同知府事督餉數月可遷爾君以不習吏事辭遂亟  
引去大鍼旣死平生藉其勢者或竄匿或縲紲繫之或遇于道至唾  
其面而君獨以遠權力一無與焉人曰咎君可謂皎皎素絲涅而不  
緇者已君性孝友六齡繼母王撻之無完膚幾絕婢奔告其父父大  
憾君曰母撻兒教兒也家人聞之盡流涕及父卒執喪盡禮讓產及  
其弟鄰里匱乏有昏喪必助之君始居懷寧縣北菽坂廬舍爲寇所  
焚乃徙桐城棕川之梅渚晚結茅杏花村筮之得坤之萃曰括囊无  
咎无譽因自號晚訥書其壁曰飽吾嬉焉爾臥吾寧焉爾醉吾陶陶

焉爾又曰惟慎無憂惟忍無辱惟靜長安惟儉長足君子學博綜經史旁及醫藥卜算之書老而愛釋典恆語其子曰吾前身恍忽在深山草閣中積雪千丈有龐眉叟行送別執手不能舍來自雪中吾生矣吾沒之日亦必以雪夜及臥疾天大雪擁被起曰吾其逝乎遂卒君妻阮氏曾祖鸚巡撫浙江都察院右都御史祖以臨欽州知州考士鐸銓授府推官歲乙酉叛卒屠城阮氏遇賊以刃脅之不從身被重創猶罵賊幸不死享年七十乃卒子男二人茹芝茹穎女二人孫男三人女六人曾孫女一人銘曰  
適來雪也適去亦雪也夫子之潔也琢銘幽宮永勿涅也

文學曹君墓誌銘

君姓曹氏諱山秀字中峽嘉興人祖父皆不仕君幼習詩補縣學生員歲乙酉嘉興城破子年十七依外父馮君避地練浦塘東君世居幽浜子兄事之有吳君莖者人目爲狂生家橫涇水曲相去各二里

而近中道爲五兒子橋二人者暇輒相訪糲飯一盂肉一椀酒一注  
留必醉飽日將暮悵悵不忍別及橋徘徊橋上縱論天下事有不合  
吳君瞋目視大譁唾及人面橋畔叢祠有病僧聞之駭蹣跚出窺戶  
牖則見笑啞啞不止疑始釋也旣而予同君讀書烏木橋村賦詩曰  
酬和君有詩曰魯連思蹈海申徒欲沉河猗嗟古之人不爲世俗阿  
俄而盜劫主人居君有弟從學善泅水盜至遂投河君亦亟投河沉  
浮于水者數其弟竟死而君不善泅水反得不死鄉人以爲詩讖君  
痛弟故自是不復作詩專治舉子業弟子從之游者漸衆館真如僧  
舍僧寂月通儒書能詩予每偕吳君造君則寂月亦至劇談移日不  
去夜坐彌勒龕琉璃燈下恆達旦不寐寂月語人曰與諸君譚假令  
載筆記之卽法言中說也聞者怪之不顧予旣客游四方久之吳君  
亦入楚轉客于黔以卒未幾寂月亦逝君十赴省試不利乃附載運  
船訪予京師會予奉命主江南鄉試君至則大困旅食淨度寺著散



懷錄自遣比予還則君已病遂不起予往視其斂兄子某扶其柩還半塗亦沒淹數月始達于里子某葬之先世之原君娶某氏繼娶卜氏卒時年六十嗚呼方予與君田居往還晨夕者寥寥數子相見肝膽畢露妄謂天下無不可交之人無不可言之言其後朋游日廣夷憚怨隙皆非吾意所期始信久要之難悔少日之失而轉惜舊友之亡爲可痛也銘曰

生吾以爲兄死吾與爲銘人不如故先民豈欺我哉

張君墓銘

南徐之州斗分野大江浮浮繞城下吁嗟張君老環堵易緯蒼牙詩  
媿雅曉吟午誦夜膏火稽之于古闢學舍包咸章昭庶其亞身雖不  
遇行則果貽厥子孫三獨坐施于有政無不可譬諸江流千里寫發  
源自岷者君也有崇斯丘神所妥斧屋旣封樹粉檟納銘于幽告來  
者

高士李君塔銘

高士李君者自上海來平湖割西宮道士之樓居焉以醫藥自給年七十病卒君先世曰尙袞曰中立皆舉進士尙袞未授官中立爲大理寺右評事又有立武功與倭戰沒者建祠南匯城代爲士族而與君游者多不知其門閥年二十間道走桂林名書仕版而與君游者終不知其官資君娶伍氏再娶殷氏鞠氏先後生子九人悉夭而羣從皆學官弟子與君游者或不知其有家室子姓於醫受業于季父中梓士材中梓撰方書一十七部君補撰藥品化義醫學口訣脈訣彙辨痘疹全書四部刊行之有延之治疾者數百里必往視疾愈不責報或酬以金輒從西吳書估舟中買書不論美好由是積書三十櫝繞臥榻折旋皆書也與君游者相對樓下不知其儲書之富客過無分出處貴賤怡顏相接暇則坐輕舟載花郭外藝庭前飲客酒必自遠致山肴海錯饌必豐與君游者不知庖爨何地而君意所嚮何

者爲疎密也歲在丁丑冬十有一月予至平湖則君已疾革視之猶披衣起坐出所著

南吳舊話錄暨所撰詩古文曰放鷗

亭集并以付予且命弟子以所儲書二千五百卷畀焉其餘散去平居玩好一瓢一笠一琴一硯悉分贈友朋越二日終遺命弟子用浮屠法盛尸于龕焚其骨瘞之塋後二年訪君葬所則近在東湖之濱其友江某實治其藏焉弟子蔣某徐某請予銘以垂之永久銘曰

君諱彥貞厥字我生後更延昱

古文夏字

爰遁于野改字辰山亦曰寒村

被道士服栖琳觀之側汎汎松舟而泝而游疾者熏灌或以解散有花有苗有甲有條步欄兮逍遙有經有子有文有史搖筆兮伸紙有肴有膳有藪有魚留客兮康娛嗟君之窀穸兮忽自逃于釋兮嗟君之去故都兮委恆幹于東湖兮或疑羽流或謂僧伽視我銘辭其高士邪

曝書亭集卷第七十八

曝書亭集卷第七十九

秀水 朱彝尊 錫鬯

墓誌銘 六

烈婦楊氏墓誌銘

華亭之鄉伍胥浦之右有水曰璜溪陳氏世居其上烈婦楊氏者儒  
學生諱某之子給事中諱某之孫嫁陳某生三子一女歲在乙酉八  
月松江城破游卒乘勝至璜溪執陳某斧傷其首烈婦奔救其夫卒  
舍某執婦某得脫婦給卒曰毋縛我我走及汝卒信之比登舟遽躍  
入溪中死時年三十有一陳氏之僕有妻曰張惜匿葭葦中見婦死  
狀兵退其長子曰治年十二號于溪畔越二日婦尸浮溪面得就斂  
當是時游卒大掠溪上一婦投溪之東曰徽州商人孫氏之媪一婦  
投溪之西曰儒學生孫諤妻顧氏三人皆完節死烈婦幼能讀毛詩  
孝經列女傳平居訓子女不輟舍傍有梅三十本皆其手植蓋至今

存也治好學多材藝游于京師以醫自給將歸葬其母乞其友秀水朱彝尊爲銘銘曰

溪之水沄沄若斧者墳於戲女子而烈如是既活其夫乃捐其軀有子也賢壺行斯傳我銘于石南史是擇

蔣孺人墓誌銘

康熙二十有三年彝尊謫官居京師之宣南坊武進龔勝玉持束紡升堂再拜請銘其祖妣蔣孺人之墓彝尊老矣而文不加進恆自惡許之而未果作也後三年勝玉復謁予宣北坊固以請乃取其季父燾所爲行狀誌之曰

孺人姓蔣氏先世侯爵也自宜興徙府城曰某曾祖考也曰某江西吉安府通判祖考也曰某國子監生考也年二十三歸龔某事孀姑以孝姑歿哭盡哀上膳繆幕無異事生者其持家以儉蒿簪布裙躬自操作相夫子三十年生產日益既遭亂率其子士燾匿深村葭葦

中士標中涇疾殞叔子士黯亦殤越三年而寡孺人少知書能讀孝經列女傳教其子若孫讀書歲時腰臘修祀事惟謹門以內肅然睦于娣姒族人喪葬輒以錢資之有貸者靡勿與與不責其必償也孺人年七十季子士燕以治曆官欽天監曆科博士假歸於是五子及婦十孫咸奉觴爲壽鄰里以爲榮旣而士燕又死歲在己未孺人亦以疾卒享年七十有七子男八人女一人孫男若干人女若干人曾孫男若干人女若干人勝玉好學有文以國子監生知名一時昔河東柳宗元于其母盧叔妣陸伯祖妣李皆不外求而爲之誌勝玉宜古是師顧數請于予予則烏能詳孺人之壺行也系之以銘銘曰  
杞也妣宋也子楚也芊蔣諸姬文公裔封通侯陽羨里後徙郡世廩仕孺人賢爲龔婦孝厥姑配嘉耦訓子孫勤莫比善必昌自今始蓼莪山樹枌梓井同穴葬于是勒吾銘庶垂久

朱孺人墓誌銘



先太傅文恪公有女二人其一作配臨安縣儒學教諭平湖陸君瀾原彝尊之王姑也生子埜以能詩聞于時女嫁劉炳圖文恪公子女中孺人最少年十四嬪于陸氏族黨交稱其賢敬以事姑謙以接娣妯儉以自處家人外內忘其爲宰輔臣女也孺人生于萬曆三十八年正月日歿于崇禎十六年十一月日年三十四卒之日一女甫嫁子猶未婚也陸君悼孺人不已遂不復娶獨居四十年及卒有孫四人曾孫男女七人於是埜昇孺人之柩祔葬于東湖之鱗圩屬彝尊爲銘彝尊生時先太傅已卒是時曾祖王母何太夫人尙存孺人歲歸寧者再伯叔舅弟姑姊妹羅拜于堂猶記孺人貌言必莊行坐皆有矩度今老矣回首少日事若夢寐先人北門之宅曩之聚族居者已不可問及孺人之葬北門羣從少長零落殆半銘其墓不禁涕泗之下也銘曰

朱氏之先居商河之澚贈少保者孺人曾祖祖同厥官太傅爲父實

相熹宗事在策府陸亦清門莊簡後昆夫也通儒子才逸羣齒雖不  
永後嗣則繁東湖之瀆松柏在原北基井榑孔固且安孰銘幽宅乃  
其歸孫

嚴孺人墓誌銘

常熟隱湖之濱隱君子毛翁居焉其繼室曰嚴孺人孺人者明光祿  
大夫太子太保吏部尚書武英殿大學士贈少保諡文靖諱訥之曾  
孫隆慶丁卯鄉貢進士承廕中書科中書舍人諱治之孫國子監生  
諱柟之女年二十有三嬪于毛氏孺人生長高族既嫁卻綺紈金翠  
之飾簪蒿裙布甘與翁偕隱翁先有母戈甫昏疾篤孺人居姑喪所  
以致其孝者無不盡也翁先有一子三女孺人撫之若己出所以用  
其慈者無不周也翁于家祭折衷司馬氏書儀朱子家禮行之孺人  
潔治錡釜所以將其敬者無不專也翁從游錢尚書謙益之門勤學  
嗜古博覽典籍謂經術必本漢唐庶窮源得以津逮乃于崇禎元年

開梨棗之局發雕經十三史十七于所居汲古閣下時諸務未中條  
理明年孺人來主中饋分命僉僕各執其役讎勘之賓劖刷之工裝  
潢熟紙之匠各從其宜秩然有序則孺人內助之力居多自元典章  
用宋熙寧經義取士所主傳注率本淳熙諸儒明因之經生立異義  
者黜又以灑掃應對進退易古小學其後書數方各均置不講而識  
文字者寡矣挾三家村夫子兔園冊足以取高第縻好爵而有餘無  
事洽聞周見也翁深憂之力搜祕冊經史而外百家九流下至傳奇  
小說廣爲鏤板由是毛氏鈔本走天下翁旣沒孺人持門戶又二十  
一年其季子展精小學傳寫諸家金石書畫記及古五曹九章算經  
思盡刊刻以行可謂善述先人之事者已翁初名鳳苞字子晉後更  
名晉別字潛在天啓崇禎間屢試于鄉不利兵後遂高蹈不出有子  
五孺人出者四曰襄曰袞曰表存者展也孫二十人曾孫二十三入  
翁之葬也錢尙書銘其藏矣今以孺人祔展率其諸兄之子來請銘

銘曰

裴宗五眷李族三祖志尚詩書相門之女河間汲郡抱經以傳隱君  
嘉耦其功媿焉同穴既封考宅永久我作斯銘竊附蒙叟

王淑人墓誌銘

淑人諱克榮姓王氏順天宛平人今保和殿大學士太子太傅兼禮  
部尚書加三級熙之女光祿大夫太子太保禮部尚書諡文貞諱崇  
簡之孫布政司使贈太子太保禮部尚書諱愛之曾孫太子少保吏  
部左侍郎山陰胡公諱兆龍之子婦河南提刑按察司使介祉之配  
也

世祖章皇帝時王公胡公並以翰苑受知備顧問侍左右兩公文好  
日篤同居禁近無間言既而胡公沒遺產甚薄公配劉夫人鞠育三  
歲孤比長延經師教之學脩脯必豐又睦于懿親日費恆詘持門戶  
甚力王公每歎其賢曰吾當以女爲之婦於是淑人年十五歸于按

察君事姑惟謹不以生長富貴自矜也君既通籍爲工部營繕司員外郎遷兵部車駕司郎中以清白自勵俸入苦不支淑人拆花鈿易米鬻嫁具于市不少靳及出爲湖廣按察司僉事督理驛鹽事務會王師平雲南凱旋檣櫓駟馬絡繹于楚君治公務不遑啓居淑人事其姑彌謹明年君移官山東布政司參議督漕運駐德州未行而淑人卒卒後遇 覃恩誥贈恭人進贈淑人生于順治十七年十月甲寅沒于康熙二十二年七月辛巳年僅二十有三淑人產五女其二夭謂按察君曰姑老矣宜亟見孫爲置妾媵二人視之若娣妹然及淑人沒舉子三人女四人嗚呼婦德之難也貴則凌長才則嫉下蓋往往然矣淑人孝事其姑順事夫子而仁以逮下可不謂賢乎且匪獨淑人之賢亦以見王公門內之訓之嚴交友之厚而按察君伉儷之重自淑人沒後十年不更娶皆人之所難能也已銘曰

以淑人之德曾不永年迴鸞有紙賁于下泉伐石于燕奪玉之白刻

我銘詩可永無泐

孫恭人墓誌銘

戶部廣西清吏司員外郎休寧程君岳造子旅館奉幣稽首而曰曩者屯溪石橋之建先生記之以文道先君子爲德于鄉里甚備今不幸先恭人喪將合葬于某原卜兆有日冀先生一言掩諸幽敢以請予不敢辭迺按狀誌之曰

恭人姓孫氏世居縣之西山父處士某有五女不生男子恭人最少嫺內則處士憐之及笄歸程翁子謙翁遠服賈貿遷滁泗潁亳諸州恭人居事舅姑盡力潔盤餐而能飭躬以儉暇課臧僕種紫瓜白莧蔬果繞牆屋夜督奴婢篝火治機絞以爲常惟教二子厚脩脯延名師講經義每放假叩以所學則色喜謀于夫子置祭田春秋聯其宗族又念所生之不祀也別爲祠屋立粟主俾二子陳俎豆拜焉嗣戚懿之窮者賻鄰里鄉黨之死喪者至率水之隄屯溪之石梁動費



金錢累萬恭人悉勸翁成之蓋翁固樂善不倦亦由恭人傾箱篋不少靳蓋所見者遠而所施者弘矣今世祿之家夫不以智率婦不以義從往往爲之婦者輒制其夫夫亦甘受制而不知恥卽爲善之念油然而根于心而管鑰恆司于內雖銖兩之需不謀諸婦不可得由是失其初心者不少也惟浮屠道士營造動以禍福惑愚婦人則施予者有焉以予聞恭人臨沒誠其子勿作佛事嗚呼恭人孜孜爲善若是特不惑于二氏此士君子所難能也已恭人生于明崇禎元年月日卒以康熙四十二年月日享年七十有六以 覃恩誥封子二人長卽員外君次崙內閣中書舍人出嗣世父後女二人均嫁士族孫男五人女一人曾孫男一人銘曰

德積于身寧責報于子孫然不爽者天徵信者文吾銘其藏豈惟以貽程氏之後昆

馮媪冢銘

嘉興縣治東南三十里曰練浦浦之東民居曰馮村村之女有終身不嫁年六十七以死者曰馮媪媪之兄歸安縣儒學教諭馮君也葬媪于君之宅西二十步而誌之以文者君女壻朱彝尊方媪年少父母欲嫁之媪之言曰吾好直言而貌樸好直言必獲罪翁姑貌樸則不禮于壻嫁焉未有不困者也吾從兄嫂以居而送父母老何以嫁爲馮君憫其言不復強也媪之父母旣沒食于其兄者四十年君旣就官乃依予妻以居抱予子女甚謹予游嶺南歲丁酉正月媪以疾卒予妻視其殮殯焉予哀媪無祀爰封以土銘其藏在某年月日嗟夫婦人之義從一而終嫁而寡守貞宜也其或未嫁而夫死雖未從之以身守其言不改其節蓋世之所難能故或旌其門或表其閭則猶有名焉若媪之貞無得而名焉者也予嘗疑媪迷惑佛氏之言詢之馮君暨予妻則媪生平未嘗事佛異哉媪之所以自處也銘曰  
猗女子之不字無非無儀瘞汝銘汝夫又奚嗟

葉嫗冢銘

葉嫗者乳予于襁褓者也予生四齡嫗歸歸九年浙東西大旱飛蝗蔽天歲饑人相食而嫗之夫適死因就食予家予家自先太傅文恪公以宰輔歸里家無儲粟先大父繼之益以廉節自礪知楚雄府事還力不能具舟楫至是先大父已卒先處士安度先生家計愈窘嘗至絕食從祖諱大定通判成都以蜀江米四斛貽處士米色殷而糲食之咽喉若中魚骨嫗不得飽乃流涕辭去十年之中凡五嫁而夫輒貧嘗語人曰安得十郎驟富使我老不復更嫁乎其言可憫如是十郎謂予也嫗年七十有一而死死之日後夫益貧予妻爲典衣買棺以殮越明年戊申予在濟南聞而哀之資其夫錢若干俾往瘞焉寄之以銘曰

婦人五嫁理則不可貧實驅之否誰依者傷哉貧乎乃至辱其身乎曝書亭集卷第七十九

曝書亭集卷第八十

秀水 朱彝尊 錫鬯

行狀

徵士李君行狀

曾祖考應徵國子監博士祖考士標寧海州同知贈尙寶司丞考寅  
國子監生君諱良年字武曾初名法遠又名兆潢年三十乃更焉先  
世江陰人明洪武初提舉行千四者徙居嘉興長水上梅會里七傳  
至博士中萬曆元年舉人有詩名著澄遠堂彙稿司丞繼之有蒼雪  
齋集當同知寧海州事值冷口兵入圍城固守三月以勞卒而城陷  
巡撫右僉都御史曾化龍上其事得贈官君之考上舍以結客破家  
饘粥恆不給然必延師教諸子妣顧孺人佐之脯脩獨豐故君之兄  
弟咸奮志于學君九齡能草時文十齡解賦詩既而上舍客死韶州  
家產益落鬻其故居兄弟並棲小屋君又喪偶就族人爲童子師予

方避地長水偕里人詩篇酬和處士屠犢謂予曰子之才里中罕儷  
吾門有李生將來庶幾與子並駕乎予遂與君定交晝輒劇譚夜或  
襪被共寢四方賓客至則釀錢留飲相與論詩文流別議有不合難  
答紛綸聽四坐折衷而後已君既再娶始有居一廛集同里詩人聯  
句樓上君兄繩遠弟符與焉江鄉言詩者目爲三李時商丘侯方域  
南昌王猷定皆以所撰詩文鏤版于浙君覽之終卷曰是不難遂期  
予共作古文沿流溯源論次之於詩持格律甚嚴嘗抄撮詩中禁字  
一卷授學詩者繼乃舍初盛取中晚唐及宋元諸集別出機杼鏘洋  
澹沲極唱歎之致於詞不喜北宋愛姜堯章吳君特諸家故所作特  
穎異子游京師轉客太原後二年君亦至都下無所遇留宣府子從  
逆旅見君期之復入都偕游西山題詩于壁傳抄者不絕一時朝士  
爭欲識吾兩人每召客客輒詢坐中有朱李否合肥龔端毅公鼎孳  
爲文酒之會延知名士三十餘人君以墮馬後至燭見跋矣必俟君

至乃舉爵宛平孫侍郎承澤謝客著書特與君爲忘年友長洲汪編  
修琬爲文高自矜詡獨傾心下君沛縣閩舉人爾梅論詩斷斷惟與  
君相洽君方欲羅當代之文甄綜爲一集曰文緯人咸冀君之錄其  
文也故縞紵之投恆倍又持論和婉多可少怪善言作者之心思故  
人皆樂就君論說永年申檢討涵盼常語人曰聞朱十論詩文使人  
心懼未若李十九之可親也於時曹侍郎申吉出撫貴州引君爲助  
旣聞三藩同撤君曰亂將作矣遂力辭歸爲母壽旣抵家雲貴告變  
歲戊午

天子思得博學文儒備顧問著作之選君被薦入京師己未三月朔  
召試體仁閣下 賜大官饌高坐而譙申以 詔旨謂文武科進  
士殿試未有此典也君譙畢纏纏千言賦詩皆極瑰麗閣臣以八十  
卷進 呈顧君不與焉君旣不得意有鳳陽守延君君與偕守重君  
自畫諾外悉以委君君留久之歸築秋錦山房于漾葭灣其南曰觀



槿東曰剩舫北曰息游艸堂坐臥其中弟子著錄者曰衆君精心計其築艸堂也櫛櫨柱枅瓴甃之屬一經鳩度立匠人圻者于前分授之斧斤既施不爽尺寸至于相原田治耕稼藝蔬果雖農圃恆歎以爲不及也其後兩至福州贊巡撫軍事尋以崑山徐尙書乾學開書局于洞庭山君應其招助修一統志自是歸不復出予既罷官與君往還投壺飲酒無異少壯時今年五月君病疴既痊矣復病竟沉絲不起享年六十初娶錢氏兵科給事中桐鄉諱允鯨之孫生員汝邁之女繼娶陸氏子一人潮偕國子監生孫男三人菊房莢房蓉房君所著有秋錦山房集若干卷嗚呼自君以薦入不登朝簿同時無不惋惜雖然才也者衆人所嫉當日與君並薦稍以才自振若宜興陳維崧富平李因篤上元倪粲仁和吳任臣宣城高詠既登用矣皆未遷一階以沒以君之才使入仕籍安知不有忌者而君得優游幕府偃息于田里菽水足以養親大小之山上下之洄足以樂兄弟詩書

足以教子孫耕桑足以課童僕則天之所以予君者不爲不厚彼一命之榮要不足爲君重也竊意君雖未仕他時國史傳文苑宜及焉乃因潮偕之請書其平生大概以爲狀俾後之君子有所考

國子監生錢君行狀

國子生錢君旣卒其子炆衰經稽顙請予作狀予與君居同里君之舅譚給事瑄陸閣學棻子中表兄弟也炆又從予游講經學習聞君門世及君行己本末義無可辭狀曰君諱標初字又鶴世居海鹽半邏村本姓何氏始祖某于洪武中坐事戍黔屬其次子某于錢翁遂更錢氏五世祖薇中嘉靖壬辰進士官禮科給事中以星變陳言請斥方士忤旨免歸講甘泉湛氏之學卒贈太常卿高祖與映嘉靖甲子順天舉人曾祖周內閣辦事中書祖嘉徵以諸生入貢留京師值壯烈愍皇帝初踐位是時魏忠賢方怙勢人莫敢言嘉徵首上疏劾忠賢滔天十罪直聲動一時久之除知松溪縣事還卒于僧舍考泮

崇禎丙子舉人妣譚氏山東布政司參政贈太僕寺卿昌言之孫官  
生貞和之子君生十齡而孤居喪如成人克盡禮服除兵起城遭屠  
乃奉母村居而君之祖留松溪唐藩建國擢監察御史時七閩未入  
版圖諜報有司奉臺檄捕家口繫君獄中祖還始得釋旋補學官弟  
子授第楨以書或勸君入國子監試京闈君乃一至都念母譚孺人  
不已卽引歸鹽豉菽水盡潔白之養有餘周其族鄰買田以供舅家  
墓祭俄弟楨歿以所愛子燔爲後及弟婦遺腹生男君殫心撫育之  
居母喪尤盡孝葺治先世丙舍手植松楸嘗稻麥果窳必薦新于祠  
屋至于私錢出入無錙釐妄費審緩急後先以分薄厚不啻不濫人  
咸服君治家之有法而予嘗遇君于舅氏所劇譚古今事君世受尙  
書能辨析今文古文中文之別而兼通周官禮經國理才之方吾鄉  
自明宣德四年析嘉興縣地立秀來嘉善二縣其時祇依戶籍爲憑  
不以疆界分畫故三縣之田互嵌民相安者二百餘年迨萬曆十三

年嘉善之民忽以糧額不均起訟於是三縣爭訐紛綸不已蓋至今猶然江浙賦夙重吳俗相傳明太祖惡張士誠拒守故重斂其民畝稅有輸官七斗餘者君爲論辨其非是謂禍始于賈似道經界推排之役當日原有官田民田官田輸租民田輸稅其後知府事趙瀛取而均攤之嘉興官田不及二千頃而民田五千八百餘頃故其賦最輕嘉善民田止三千一百餘頃而官田二千七百餘頃故其賦于三縣中差重輕重由官民田數不均非因嵌田之故著論萬言推衍事始更端詰難其言旨悉與予合予益信君學術之有本也君娶陸氏繼娶吳氏子男六人女一人孫男七人女十人嗚呼今之治舉子業者局守宋儒之訓注百翻兔園之冊足以取科第而有餘問以鄉曲之利弊茫然如坐雲霧其與斯世何裨焉君能繼其家學彊直自遂又以餘力考稽財賦鹽筴之源犂然有會于心發爲論辨無異建始文學御史之議惜乎不用于時終老牖下人亦罕有知者此予因爇

之請傷君之亡不可以不述也謹狀

亡妻馮孺人行述

孺人姓馮氏諱福貞字海媛世居嘉興練浦之陽考諱鎮鼎歸安縣儒學教諭妣胡孺人生母沈氏教諭君爲學官弟子有名交漸廣乃徙居府治之北再徙碧漪坊去先太傅文恪公第近止百步教諭君年過四十無子生孺人特珍愛之五齡延塾師陳翁授毛詩孝經有費姥者往來教諭君家見孺人聰慧爲先妣唐孺人述之唐孺人屬姥爲妣是夕教諭君夢文恪公衣袞造其門遂以孺人許彝尊爲配寒家自文恪公以宰輔歸里墓田外無半畝之產祖考忱予公知楚雄府事還僅敝衣一簾而已至本生考安度先生家計愈窘歲饑恆乏食行媒旣通力不能納幣彝尊年十七爲贅壻于馮氏之宅遭亂兩家各去其居唐孺人病終丙舍安度先生攜兩弟播遷塘橋之北生祖妣蔡孺人又歿先生益窮苦彝尊旣昏孺人贊予往侍養教諭

君以田二十畝持券付孺人孺人語予曰割父之田以奉翁非力養  
矣辭不受挈其女至塘橋鬻所有金條脫治饔膳爲兩弟補紉衣履  
隘不能容遂賃梅里道南茅亭之居迎先生至里繼又移居接連之  
橋予授徒不給遂南渡嶺越二載歸則孺人徙西河村舍是冬復還  
梅里所居屋人傳多鬼物目爲凶宅孺人不少懼每晦夜滿屋梁皆  
白光牆下鷄喞喞有聲女巫來言發之當得金孺人謝曰吾夫家累  
世顯官可以不貧今貧若此天也非所得而得之天其殃之矣蓋居  
是宅十一年未嘗萌一念及室中之藏焉教諭君卒于歸安官舍孺  
人聞訃攜子昆田及老嫗二人見星而奔是時新塍以西盜賊充斥  
舟子咸股栗孺人拊心號哭至哀羣盜舟泊岸相顧不忍肆劫予年  
二十卽以詩古文辭見知于江左之耆儒遺老時方結文社興詛誓  
樹同異予概謝不與而四方知名士往來于禾者輒造梅里孺人治  
酒肴必豐雖夜分區畫立辦賓客過者談讌極歡或淹留旬日方去



花鈿無多盡付質庫晝夜紡績以贖客至復質如是以爲常交謫之言初不聞于梱內也歲癸卯予客永嘉其冬安度先生病革家無斗儲孺人邀予姊妹同視湯藥予歸未旬日而安度先生棄世孺人哀毀治喪事靡不中禮旣而予游大同轉客太原入于京師復留濟南孺人力持門戶歲時膾臘修祀事惟謹延經師于家誨昆田必具酒肉操作愈勤夜率二女治機絞不輟坐昆田于紡車之旁執卷于燈背令就火光課晝所讀書必成誦乃已給紙筆使臨摹法帖凡昆田交游至或有燕朋雜于坐孺人必嚴誡勿與交越五年予歸里爲昆田婚買宅于鄰宅西有竹曰竹垞謀葬安度先生唐孺人于長水之東將井椁矣葬師僉言不利主婦謂改歲乃可孺人語予曰姑之柩留丙舍二十餘年翁亦六年矣此而不葬葬何時乎禍吾當之勿悔也乃克葬彝尊以序當後晦在公孺人事公無以異于事安度先生也歲在乙卯公歿于項氏寡姊之室孺人往治喪成禮宗鄰稱其

賢孺人既嫁二女教其孫及外孫一如教子法己未予以薦

召試體仁閣下授翰林院檢討纂修明史辛酉充日講官知起居注  
是年主江南鄉試雲南平

覃恩封孺人貶贈唐孺人壬戌挈孺人入都癸亥予入直南書房

賜居黃瓦門之東甲子元日彝尊方侍宴

天子念講官家人居室特賜肴果二席孺人九拜受之洵異數也  
是月予被劾謫官三月移寓宣武門外孺人尋病病愈以秋八月浮  
舟潞河還語予曰

君恩重夫子且留毋悻悻去自是予留京師既補官孺人聞之乃  
復由江淮北上抵泊頭運河冰合孺人中寒而病扶入車既至病漸  
痊壬申正月予復罷官三月解維張灣津路澹紆以五月次東昌則  
分水牕已閉舟車酷暑孺人病又作比旋里爲長孫完娶時生母沈  
先已病歿家人祕不言孺人詎知之大慟病復發餼粥不進其後時

止時作猶強起櫛沐理家務迨冬十一月馮村族人以教諭君墓木且伐來告孺人心悸意謂未然既而果遭伐孺人悲憤病愈劇蓋自是臥不能起醫藥不能療及臨歿時語不及家事惟執昆田手曰汝幼時汝父遠客我教汝讀書冀汝上進今汝七試而名不成我又不能待命也夫語訖昆田方哀號而孺人逝矣孺人生于明崇禎四年九月廿一日未時卒于康熙三十三年二月十四日卯時享年六十有四子一人昆田禮部注籍監生娶沈氏女二人一嫁吳江周能察一嫁桐鄉儒學生員錢琰又從弟彝性沒二女無所歸孺人撫爲己女一攜至京師嫁國子監生秀水徐雍一嫁吳江貢生吳南齡孫二人桂孫稻孫孺人歸予將五十年少日遭亂恆與予夜避叢篁密篠中流離顛躋凡徙宅者十一始克寧居爲兩叔一子四女一孫昏嫁治兩翁及母胡喪備諸辛苦又津塗往來莫或遑處蓋終身憂患未嘗一日自安平居慈愛肯周人之急所至鄰里戚懿無不歡洽雖漁

娃竈妾食必推與之以是孺人之歿聞者無不歎息嗚呼悲夫謹撫  
其遺行以告立言之君子

誄

故都察院右副都御史總督浙閩軍務朱公誄

嗚呼邾婁之後望沛及吳其在于齊東郡是居枝分葉布本一根株  
公之哲彙讜言無隱撫浙制畿中法而殞紀于太常易名惟允公也  
繼起早歌鹿鳴牽絲作宰視草爲郎黃圖樹屏儷于薇堂

天子是葵殊渥超拜紅籀碧幢填撫嶺外入奏嘉謨出承大賚公旣  
莅止綱舉目治薄賦惠商吏畏民懷人不敢者公乃有爲盜先殺人  
後收貨賄舊染汚俗積不能改公捕獲之悉沉諸海江則有沱船則  
有戈商行千里蠶漿而歌頌公之德久而不磨旣遷于閩治與粵位  
閩兵易譁教之以整閩俗易囂鎮之以靜公于仕已喜愠不形扁舟  
歸第對客一枰宣勞河曲疾疾乃嬰公疎禮法胸無水旱廚傳雖盈

濁醪糲飯不知公者謂公爲媿公率寮屬見必分曹肺腑之語辭不在多不知公者謂公爲驕公今逝矣還喪歷下我瞻大東老成徂謝舍彼華堂銜悲長夜公之清忠當代共知吾思他日國史紀之無徵不信視此誄辭

哀辭

沈武功哀辭

歲在己酉冬予將往濟南友人沈武功送予落帆亭畔越二年歸里武功偕予登胥山賦聯句詩未幾別去予留江都武功寄予書將葬其父處士君世涵具狀來請銘銘未就鄉人自南來則武功以正月癸丑死矣武功幼遭亂失學九齡始自讀書日記誦萬言長工于詩性恬澹不樂士進居父喪盡禮事母至孝卒時年三十沈氏自南京大理寺卿玄華以廉慎聞其子文琦博洽負時譽人謂必相繼取科名卒不遇再傳至處士君省試將見錄矣復擯而武功亦困窮死嗚

呼生才實難顧武功以上世多文采疑天于沈氏獨厚然皆終其身不得志以死至死且天此人事之最悲者爰爲辭以哀之武功諱傳弓秀水人辭曰處賤以爲榮遇不詭也豐實而藏華行勿毀也孰是人斯壽止此也妻亡矣遺其穉女親老矣鞠及童孫菽水伊何況甘旨也嗟行之人悲未已也矧在同游識君久也嗚呼欲銘其父而先哭其子也

祭文

弔李陵文

并序

朱子登乎采掠之巔覽大漠之野見有雪山峙乎西北若出若沒若廬若旅回睇從者忽失其處從者曰是所謂天山也李陵之臺在焉朱子曰噫嘻有是哉竊嘗論陵本文士顧以家世爲將欲立功殊域方其召見武臺取隸貳師軍請得步卒五千自當一隊其才誠有過人者及兵盡矢窮以身降敵短衣椎結對蘇武泣下沾襟抑何陋也



其身辱名隲亦足爲負才喜功者之戒然陵方降敵隴西士大夫咸以爲媿而司馬遷猶力爭以爲國士雖大節如武終不以衛律遇之交好尤篤則其情有可矜者也河梁之詩爲五言所自始使得一鳴饒歌郊祀之盛庶幾史克正考父之美復見于漢乃委之漠北幸而武奉使倡和之詩得復流傳于世迨武旣歸其悲惋無聊之思必有甚于平昔者登臺而望豈乏感時懷友之作惜乎不傳者蓋已多矣自古愛才之主宜莫如漢武然其所好特司馬相如靡曼之詞枚皋東方朔俳諧之體以遷之文陵與武之詩獨未聞有稱焉至柏梁旣成賦詩高會當極一世之選乃所與賡歌颺言則衛青輩一二龔豪武人及大官上林丞刀筆俗吏八九而已此何爲者邪賈生之才文帝不善用之爲世所惜若武帝之于陵用違其才殆又甚焉嗚呼才士之不遇于世自古然矣爰命從者酌之以酒而爲文弔之其辭曰入雲中而四望兮路百折以登危眴絕漠之驚塵兮悼失身于騫期

嗟平城之構患兮三十萬其莫支曾不念祖父之數奇兮不大賢于  
武臺以五千當萬騎兮固宜心一而不離何女子載于行間兮將在  
軍而莫知儒生不可使卽戎兮妒人不可與謀無援師以委敵兮何  
百口之足讎死旣媿成安兮生復慚乎浞野憾因杼之妄言兮遂投  
杆于諜者前奚侯使上坐兮後丁靈之嘲我殺身旣難能兮寧歸國  
之不可斧冰以爲糝兮續帶以繩瞻畢昂于南街兮望天漢之東傾  
朝忽忽其就暮兮夜迢迢而獨興雖永絕于君親兮尙見思于友朋  
刀環旣違願兮何故鄉之足慕驅橐駝于鼈牛兮獵霜禽與秋兔登  
荒臺之奠絕兮送故人于長路舞短服于樽前兮聽悲歌其如訴身  
雖陷沙漠兮盟未忘乎曹柯歎形迹之長乖兮豈忠信之可訛居殊  
域而心故都兮夫孰明子之無他彼河梁之高倡兮麗五字而爲詩  
感杜甫之遺言兮謂二子其吾師斯人不可作兮大雅其衰才士自  
古而失職兮奚吾生之足悲

告江神文

年月日具官某謹以剛蠶柔毛香帛之儀致祭于大江之神曰某欽承

上命主試江南自誓此心澄同江水惟神昭察濟以安瀾如其寸衷有味徇人賄託廢棄真才神靈有知允當罰極復命渡江甘葬魚腹以爲後鑒謹告

貢院誓神文

年月日具官某等敢告于天地神祇先師孔子之前曰某備官禁近皇上拔於衆中俾典試事

主恩深重惟有一心攬真才以佐盛治

命下之日師友親懿一概屏絕今入棘闈用白于神如或心存曖昧遏抑真才徇一人之情面受一言之賄託通一字之關節神奪其算鬼褫其魄五刑備其體三木囊其頭刀斧分其尸烏鳶攫其肉矢言

之出百神共聞謹告

祭孫侍郎文

公之歷仕記則有史公之生平藏則有銘我姑略焉詳公文情往歲  
丁未我未公覲公獲我詩賓座賞擊庚戌八月謁公之堂我祛公攬  
偕步于廊款語未已旋羅酒漿自是過從月必三四公召我趨我歸  
公至嗟世論交不樂草茅雖在丘園以位自高誰肯忘年撝謙用勞  
公以先覺自稱同學題扁見貽竹垞之楮我歸二載公顏未改仰屋  
著書一本程朱河淮之議水田之利舍彼薦紳芻蕘是詢公學不泛  
攷古能鑒示賓琰玉僉目爲劍尊曰不然作釋圭一篇公書報我謂  
云可傳歲且更始祠考亭夫子執杼視壺廢徹而鋪公言子去歲必  
來助我考之喪見星而奔公命哲嗣馳賻國門書言臥疴未克躬唁  
期子重來慮不爾見我時臨發對書載咷朔南攸隔歲月其愒旣達  
于京公果逝矣不覩公容覩公孫子回憶公言聲悲益吞僅一人知

己而又不存觴酒在筵挺燭在几我涕有盡我哀何底

祭納蘭侍衛文

嗚呼往歲癸丑我客潞河君年最少登進士科伐木求友心期切磋  
投我素書懿好實多改歲月正積雪初霽紉履布衣訪君子第君情  
歡劇款以酒劑命我題扇炙硯而睇是時多暇暇輟填詞我按樂章  
綴以歌詩翦綃補衲他人則嗤君爲絕倒百過誦之迨我通籍簪筆  
朵殿君侍羽林鮫函雉扇或從豫遊或陪曲宴雖則同天朝無幾  
相見我官旣謫我性轉迂老雪添鬢新霜在鬚君見而愕謂我太臞  
執手相勗易憂以愉言不在多感心傾耳自我交君今逾一紀領契  
披衿敷文析理若苔在岑若蘭在沚君於儒術繁學博通文詠書法  
靡有不工康里巉巉字尤魯仲暨薩都刺未知孰雄君之勇略侍  
帝左右騎則籥雲射必穿柳出師絕漠不憚虎口乃眷 帝心倚毗  
良厚當其奮武不知善文及爲文辭不知能軍允矣君子才實逸羣

隨陸絳灌異於前聞和氣婉容承顏以孝友于昆弟古昔是做謙謙者守溫溫者貌逆之勿恚順之無傲花間草堂淥水之亭有文有史有圖有經炎炎者進或鍵而扃縫掖之來君眼則青浮醪于觚盛倉以筆夜合惺忪花散籤帙聯吟比調曾未旬日詩朋尚在忽焉輟瑟彝尊月朔謂君尙生問疾而止入巷心怛復者在屋升自東榮魂招不來躑躅屏營寢門旣哭容車將騁大泉一枚蠟燭一挺侑以荒辭泣下如綆靈兮有知痛無不省嗚呼尙饗

祭劉太夫人文

嗚呼太君其德斯柔色斯愉也孝以爲婦而順以承夫也以嚴則母慈則姑也卑尊長幼咸克有孚也樂善之勤靡終初也相少保公之起家縣令而躋尙書也太君子時挽鹿車也千里之行奉板輿也在汾之陽在浚之都也錦軍之城白門之廨往必俱也總師于邊贊中樞也耆德旣隆壺範益攄也九伐司馬五教司徒也三典司寇進三



孤也禴翟之榮錦韜象軸賁于閭也公沙六龍皆民譽也其二同懷  
二入翰苑女封夫人則鳳雛也孫曾則百誥誥揖揖螽斯如也爰自  
侍郎公之墳撫兗青徐也河山十二極海隅也沉冤之獄滅其辜也  
敝劫之民緩其逋也災傷之地蠲其租也賑者累萬必及其孥也是  
乃奉太君之教以成公之訏謨也蓋太君之仁匪特下及家人子姓  
而已凡賓客之至問所須也及饌遺所無也貸者無不輸也惠心淑  
問難悉敷也嗚呼太君貴矣富矣昌矣大矣壽矣康矣榮矣哀矣稽  
之于古殆莫之與符也某等從侍郎公游歷下獲拜太君子堂而忽  
聞長逝誠不禁涕泗之霑裾也牲之禴也酒之醺也盤有果而俎有  
脍也踞陳于筵几之前念德容之如昨而不可覩矣爲文告哀冀靈  
之式鑒而享此肴蔬也

祭黃母周孺人文

嗚呼孺人嫁不必鄉里寓公是歸產不必多男有子而才當其相夫

子而仕也六館四門教胄子也監丞之賢孺人爲之耦也及其殞所  
天而孀也慈闈之訓兼義方也徵君之賢孺人成其名也嗟世營營  
聲利是求維孺人之德安貧勿憂餐以菽水不事鼎飪服以縞綈不  
事玉錦古聖微言載在六經有圖有史百氏縱橫香廚祕閣易散難  
并監丞耽讀廣爲探纂徵君益之凡八萬卷朝哦夜誦孺人佐之機  
絞之聲徹于書帷歲著雍敦牂閏月修竊我辭白門言歸柴辟徵君  
邂逅周在浚之宅時鶴書初下有司敦迫人爲君喜君蹙其額匪榮  
名是逃念母氏兮劬勞商秋乃發達于燕郊陳情之語僅徹東曹哀  
訃忽至杖桐而號見星斯奔過市則哭觀者道旁屏營躑躅矧在彝  
尊猶子情親帷堂未拜瀆酒遙陳臨風涕泗媿告哀之不文嗚呼尙  
饗



曝書亭集 附錄

秀水 朱彝尊 錫鬯

葉兒樂府

折桂令 正宮

鬧紅塵袞袞公侯白璧黃金肥馬輕裘蟻陣蜂衙鼠肝蟲臂蝸角蠅  
頭神仙侶淮王雞狗衣冠隊楚國獼猴歸去來休選个溪亭作伴沙  
鷗

又

故鄉人千里書投漁弟樵兄盼我回舟老僕長鬚侍兒赤脚穉子蓬  
頭趁新雨過時插柳揀綠陰深處騎牛歸去來休二頃秫田一簣糴  
丘

又

挂輕帆潞水春流夾路煙花直下揚州第二泉邊第三船裏第四橋

頭喚十五女青蛾對酒點兩三條紅蠟藏鈎歸去來休老子尊前最  
愛歌喉

又

近南湖結个書樓橋影前溪塔火中流梅蕊衝寒荷香銷夏楓葉鳴  
秋松樹底一壺村酒柳陰中幾隻漁舟歸去來休典我春衣日日郊  
游

又

問先生老矣何求一片西山幾載勾留獻賦長楊挂冠神武捐珮瀛  
洲也曾簪筆踏螭坳右手也曾移家住鼇禁東頭歸去來休閒把  
君恩說與朋游

天淨沙

一行白鴈清秋數聲漁笛蕘洲幾點昏鴉斷柳夕陽時候曝衣人在

高樓

水仙子 雙調

昏鐘百八戍樓敲旅夢三千鄉路饒平頭六十年老算不如歸去  
好得逍遙且自逍遙閒摘朵山花簪帽緊隨身村沽滿瓢醉拖條竹  
杖過橋

又

半湖山上采樵夫百步橋邊垂釣徒三家村裏耕田父這生涯都不  
苦要歸與只便歸與錦屏風蒼厓紅樹白雪灘金壘玉鱸綠楊灣赤  
米青菰

又

爲毛大可輓姬人曼殊豐臺花匠女也

玉堂傳說小名兒檀板能歌絕妙詞銀鈎會寫相思字記人扶拜客  
時勝豐臺一捻花枝留客住豪端染紙想夫憐筆柱調絲今日箇長  
恨題詩

沉醉東風



香茅屋青楓樹底小蓬門紅板橋西雖無蔗芋田也有桑麻地野薈  
薇結箇笆籬更添種山茶綠萼梅這便是先生錦里

又題周編修漁隱圖

檝頭船茶壚酒盞藕苗衣笱笠筠竿撈鰕柳樹陰放鴨蘆花岸畫圖  
中儘自消閒縱使

君恩未許還終不學鋪眉苦眼

清江引

西風古寺攀楊柳落日低銜岫山行萬里程水次雙江口鴈兒不來  
魚定有

普天樂

中呂

小樓前疎林外爰基丹井顧況書臺灣灣綠水深點點青山矮釣侶  
詩朋看都在把封泥酒甕齊開雞頭竹胎穀芽餅燄油菜花臺

又

到清秋開家宴生魚切玉野雀披絲村村斲蟹肥日日湖菱賤對竹  
千竿書千卷悶來時刻箇花船白蓮寺前青陽橋外金粟山邊

朝天子 送分虎南還

驢車慢些小住長亭者疎林不隔遠山遮幾點新黃葉雲脚天斜鴈  
書橫寫趁歸人南去也離別漫嗟只可惜中秋月

又

魚標稻苗爭似南湖好月寒沙柳夜蕭蕭帆影卸三姑廟暗水橫橋  
矮屋香茅看黃花都放了絲絛布袍再不想長安道

又 送融谷宰來賓

箏絃酒船且緩坐紅亭勸仙鳧飛度鷓鴣天種柳濱江縣木榭花邊  
柑子堂前算輕郵道六千涼煙暮蟬話十里河橋遠

又

花時荔支日日堆江市石牙山翠雨絲絲榕葉交廳事萬里相思六

六魚兒盼雙雙新燕子清詩小詞帶幾箇平安字

同作

錢唐 洪昇 昉思

氾氾鷓鴣啼徧桃榔樹鬱金香散雨如酥村社敲銅鼓退食公餘  
岸幘升車向青山閒弔古男巫女巫酹酒拜劉因戶

前題

秀水 徐善敬可

梧邊柳邊飛不到衡陽雁泮荊江上伏波船遙把才人餞桂葉青  
圓蕉實黃鮮荔支林紅萬點葛仙鮑仙天付與丹砂縣

前題

錢唐 龔翔麟 衡圃

雷江瘴鄉到日官梅放訟庭無事晝簾張沉水煙初颺醒酒茴香  
消食檳榔緩平湖菱芡想琴堂笛牀詠不了蠻花樣

落梅風

查山探梅

十里青苔路三更翠羽啼泛輕船太湖邊樣等南枝北枝花放齊也  
未必明朝風起

又

細細香苞綻泠泠淺水流趁快雪乍晴時候把短簫橫笛催上樓對  
七十二峯行酒

金字經

憶辰娘作

蝴蝶難分隊鴛鴦擬作雙行近秋花六扇牕剛迴身避乳瓠新霜降  
紅葉溼鞦韆

又

碧浪湖邊樹白蘋江上舟風雨蕭蕭不耐秋愁歸帆郭外抽從別後  
無計再勾留

山坡羊

雙林菴

涼雲池面殘陽臺殿綠槐不吐青蟲線聞河淺寺門偏蹇驢斜背風  
中繹可惜馬蹄歸路遠船橋那邊蓮紅一翦

又 飲池上

昏鴉初定涼蟬都靜絲絲魚尾殘霞剩渚煙冷露華凝香筩笑卷青  
荷柄我醉欲眠君又醒箏簾內聲燈花外影

醉太平

野狐涎笑口蜜蜂尾甜頭人生何苦鬪機謀得抽身便抽散文章敵  
不過時髦手鈍舌根念不出摩登咒窮骨相封不到富民侯老先生  
去休

一半兒 西溪 商調

滿林殘雪碧山坳人日春風金剪刀孤棹野塘紅板橋玉梅梢一半  
兒開遲一半兒早

又 靈隱

冷泉亭子面山崖蕭九娘家沽酒牌墟畔碧桃花亂開到重來一半  
兒依然一半兒改

又 淨慈

冷雲山寺畫屏秋斷塔雷封殘照留孤汊酒村風幔收載歸舟一半  
兒蓮蓬一半兒藕

又西湖

三潭新月浸魚天十里長堤飛柳絲尋到水仙王廟邊裏湖船一半  
兒剛來一半兒轉

又浙江

鯉魚風起鳳山根白鷺潮來鱉子門黃雀雨晴魚浦村亂帆分一半  
兒天斜一半兒穩

又釣臺

渚蘋山木古祠秋漁子鼠師檣小舟爭道客星天上留契相投一半  
兒君臣一半兒友

又長山瀟

鷓鴣灘冷渚風清謝豹花繁春雨晴烏柏樹翻秋葉鳴挽船行一半



兒山腰一半兒嶺

又九峯

一峯低映一峯高十里沙連十里橋曾記小船迎晚潮冷蕭蕭一半  
兒蘆花一半兒草

又虎丘

生公臺上鬪茶巾短簿祠前羅酒樽真娘墓傍凝舞塵款游人一半  
兒櫻桃一半兒筍

又錫山

錫山泉近筍輿稀竹火鑪輕松葉肥蘭草岸回花舫齊恣攜歸一半  
兒香醪一半兒水

又金山

城頭殘角戍樓開天際征鴻丁字排攜手試登山上臺暮潮來一半  
兒江聲一半兒海

又淮浦

行來沙際柳陰疎，望裏村邊酒幔孤。  
聽得渡頭人語無，遠模糊，一半兒吳音一半兒楚。

小桃紅

題王元章墨梅

斜飛蝴蝶撲枝圓，不怕游絲罥影依然。  
水清淺嫩寒天，墨痕澹處珊瑚軟，似曾相見稽山風霰一樹小牕前。

又

送德尹還里

揚州樺子小於龕，粉額朱紅檻一路垂楊繫船纜。  
水拖藍初鴻幾點秋容澹，梅花酒酣蘆花風糝，夢穩到江南。

又

前題

謝家兄弟舊田廬，好續春池句兒女團圞紙牕戶。  
儘歡娛閒尋捍海塘邊去，村醪遠沽，曾船橫渡山似小葫蘆。

叨叨令

一年一夢空愁思六張五角難成事千呼萬喚無由至姑負了燒春酒美文君市悶殺人也麼哥笑殺人也麼哥相見了只勝常兩個消魂字

又

烏巾斂了煩遮護縞衣借了親分付畫船樣了愁行路有一日踏花鹿女花間步行不得也麼哥留不住也麼哥算後會他生未卜今生誤

黃鶯兒

碧玉小人家兩眉彎雙髻丫春風愛立疎簾下佳期最佳陽差不差心知消息今年嫁翦秋紗紗帶合畫畫取並頭花

曝書亭集附錄

秀水朱檢討竹垞先生有才子曰昆田字文盜天下之得交於先生者鮮有 兼交文盜者也文盜之才清雄絕麗得之胎性而先生於書無所不窺其奧博非特今世人所罕及文盜趨庭之暇略能盡通其家學以其餘技發而爲詩其小得固已精緻雋潔大者磊落排奐世之讀之者不以爲入玉谿樊川之室則以爲登昌黎眉山之堂矣獨怪今世才人橫飛捷出充塞皇路而文盜年未五十竟以窮死豈天之生若人豐其才而塞其遇邪抑先生之泊然寧靜不欲以世人之所榮者榮其子邪獨其所成就如此無忝其家爲可傳也矣先生有文類及騰笑集行于世膾炙人口續集之成復甚夥而文盜自名其所著曰笛漁小彙先生將彙而刻之附其集以行而屬序於予予惟東坡先生嘗言在海外時其子過時出一篇見娛則爲數日喜寢食有味以此知文章如金玉珠貝未易鄙棄東坡之稱其子如此必非徒然者而今世叔黨斜川集罕傳文人學士往往以爲恨文盜既

能以其金玉珠貝之文娛先生于生前歿而得附先生之集以行于  
無窮吾知後世必將比之蘇公父子而無復遺憾者其在笛漁小豪  
之刻也夫嘉定張雲章

其初嘗曰...

其初嘗曰...

其初嘗曰...

其初嘗曰...

其初嘗曰...

其初嘗曰...

其初嘗曰...

其初嘗曰...

其初嘗曰...

其初嘗曰...

笛漁小稿目錄

第一卷 古今詩五十首

西湖

登康山

劉撫軍席上詠珍珠泉二首

西厓歸自桂林訪予長水不值而去三首

寄魯松江

次韻答衡圃

孤山拜林和靖墓

寓昭招同西厓泛舟湖上得六絕

句

抵舍三首

過演溪書屋

有感

南渚至自清溪出示黑蝶齋近詞和演溪老人韻

南渚歸清溪久不至以詩招之

夏日村居二首

初秋風雨兼旬南渚再過艸堂賦

此志喜

小齋聽雨同南渚遠士分賦得蠶



字

次演溪老人韻送南渚之白下

九月七日同遠士飲崧隱齋

題查客羅幫譜

贈錢武子先生

宿橫塘

次韻答耕客衡圃

題衡圃西湖雨泛圖二首

次耕客韻即送入都

再疊前韻送衡圃入都

三疊前韻與衡圃追話舊游

題衡圃擔花圖二首

題耕客行脚圖二首

并序

梁溪華胥為衡圃寫僧裝小影侍以雙女一拈花一奉梵書

取心經色空二語曰雙是戲題絕句

遠士以玉狸見餉戲作長句

喜晤辛齋菊隱樗菴二先生即席分賦二首

過姊妹橋

清溪訪南渚

用王臨川贈曾南豐韻寄蘅圃

送樊谿之泰安

第二卷 古今詩四十七首

得耕客都下書云首夏歸桃鄉喜而賦此

出門示遠士

過白蓮寺

萬安橋候潮

魯松江餉鮓魚

競渡歌

題荷包牡丹

第二 題查客畫扇二首

飲心在齋分得花字

蘅圃寄竹根杯

落帆亭

和遠士無題六首

題聲山仗劍圖

京口阻風

露筋祠

寶應

題東川先生讀書秋樹根圖

題明妃出塞圖

送客子歸平湖

和題硯溪紅豆書齋五首

珍珠泉

張上舍盛誇亳州牡丹遠過洛下

因賦十絕以紀且訂探花之約焉

晚步泉上

次止淵病起二首

夜夢

詠史二首

第三卷 古今詩三十首

元日立春和逋客

又和止淵八首

送王秀才之明州三首

送廣文韓生之官符離四首

官園種菜呈丹徒公

首春同逋客止淵陪丹徒公晚坐

珍珠泉上二首

食鯉魚

喜小舫初成和丹徒公二首

嘉禾篇

對菊

次夕復攜酒對菊疊前韻

食鮮鰻魚

喜雪呈丹徒公

止淵逋客既和拙詩越日風雪復作止淵又賦二百字索和

蓋欲以強韻相壓也炙硯呵凍復成是作

食鱧魚和止淵韻

泉上書懷和丹徒公韻

第四卷 古今詩四十四首

杏花用昌黎韻

疊前韻

丹徒公於澆源堂後穿池種荷賦詩四章敬次原韻

春日珍珠泉雜興五首

海棠半開小雨初過釀飲花下醉

賦二十韻

九日對菊和丹徒公

和止淵餅菊

樓桑謁劉先主廟二十韻

爲樗菴題水村圖二首

和宋牧仲先生西陂雜詠六首

淶波村

釣家

和松菴

緯蕭艸堂

芟梁

放鴨亭

我所思三章送虹亭先生歸吳江

田綸霞先生許惠羅酒久之不至以詩索之二十韻

無功招集一峯草堂學香山體

次樗菴韻壽菊隱徵君 題禹尙基並頭茉莉扇二首

客子入都出扇索書率賦二絕

張大司寇生日

送呂伸之山右二首

送吳上舍歸鹽官

雨稼止酒經年冬夜過余以詩勸

食之

雨稼飲二十杯而腹痛竟夕委頓

復欲止酒再以詩勸之

德尹表叔偕柴木過宿古藤書屋次韻奉答二首

題客子茜莊圖二首

題夏重表叔抱膝圖

第五卷 古今詩七十一首

食嘉魚和澗芳

悼秦吉了

過牆梅花

寄南渚卽和南渚送畊客韻二首

寄菘塍次衡圃韻二首

寄魯謙菴太守

九言戲爲鷗塘壽

題陳書崖納涼圖

索禹尙基畫月波吹笛圖三首

題查田蘆塘放鴨圖二首

題田樂種紙圖  
題周燕客別駕所藏畫卷

紅花埠遇雨題壁  
傷柳

別田綸霞先生  
題林先生聽鶯圖

自題月波吹笛圖二首  
勸農詩爲陸江陰作

春申墓  
題女郎周禧荷包牡丹扇頭二首

登君山二首  
題雙鬟索句圖二首



題錢舜舉春郊醉社圖 題莘橋水榭圖

題坐花圖

北發

丹徒

渡江

閩門

菽乳和楊芝田先生

送柯翰周之蕪湖四首

金山口

過合肥欲訪龔恕愚為同行者所阻悵然賦此二首

拙宜園補題三首為楊崑木賦

苔徑

巢經樓

竹瀝

贈王浦雲二首

題煙江撒網圖

題蘭亭被袂圖

初夏村居

卽事

南湖

示德鉉弟二首

夏日村居戲作吳中田婦詩十首

第六卷 古今詩六十七首

途中和答張闇成六首 題清溝朴上人小影二首

題蔡中允早朝圖二首 題梅定九山居圖

戲題嫦娥折桂圖 送蔣上舍歸里二首

與庾齋話別用無亢韻二首

送幼鯤游嵩山四首 和王清遠西城別墅詩十三首

石帆亭 樵唱軒

半偈閣 大春軒

雙松書塢 小華子岡

小善卷洞 春艸池

三峯 嘯臺

石丈 竹逕

綠蘿書屋 爲新城夫子題畫

送悔人兄還楚

壽黃封公六首

三月十五夜濟南道中遇雪同澗芳賦

鍾聖輿招諸同人泛舟大明湖八首

過臨淮

贈宋山言二首

上九江郡守叔

梅心驛書所見

同心蘭花

初食新州荔支色香味已變戲成

二律

再食新州荔支色香味無損疊前

韻二首

初食新州荔支以色香味已變漫

寓憾詞夜來重噉風韻劇佳已疊前韻二首再賦一律為

十八娘解嘲

七夕

七夕後一日

雞鸚鵡

諸葛武侯銅鼓歌為家中丞賦

林士入小邊二首

第七卷

古今詩五十三首

題秋原放牛卷二首  
七月十四夜立秋二首

題天女散花圖  
題水墨羅漢卷

題四時寫生折技圖四首

閏七夕  
佛手柑

五色鸚鵡三首  
嶺南述懷寄澗芳四十韻

汲古堂前紅梅秋日吐花和青叔韻

滄浪亭看桂  
狸奴歎

中秋前一日飲東園桂花樹下卽事

蘅圃車駕視權粵海久之不至昨聞已抵三水喜賦二律

寄宋山言  
題洋畫二絕句

中秋東園宴集分韻得弓字

又得河字  
英石硯山歌

對雨遣懷和韻二首  
晚秋雜感四首

六言絕句十六首送青叔北歸

讀青叔北歸集戲書一絕

魚梁晚望  
經嚴陵釣臺下作

第八卷 古今詩五十八首

赤烏松二十韻同張超然龔衡圃高查客聯句  
喜熈二軒

送查浦入都  
送海鹽李明府入 覲

題寫山樓主人墨梅二首

題喬無功餉烏圖  
題汪無亢松陰濯足圖二首

題汪無已秋林讀書圖二首

題沈厚餘侍兒索句圖  
題郎與賢多麗圖五首

贈巖星如  
贈顧渭符四首

閏月朔日偶成  
海棠歎五首 并序

寄張鶴洲先生六首  
題楓江漁父圖二首

題汪樸畫

題雪中山茶畫扇

萊襦叔席上觀樂同禹平卓崙賦五首

偕水村育齋南歸初出齊州途次口占

張夏

陷灣泉

過任城

題趙子固水仙

贈眼醫方叟

爲水村題采桑美人二首

采桑女

調育齋二首

午日過夏鎮聯句

夜發新開河聯句二首

瓜步阻風聯句

丹陽觀競渡聯句

第九卷 古今詩三十九首

抵舍

六月張燈口號二首

送水村育齋偕游滇南四首

題列子御風圖

秋日訪王東巖明府適弄珠樓落



成因賦二首

題紀山秋林抱琴圖二首

題客子吳船醉吟圖二首

為紀山題南渚畫

當湖李潛夫馬和衷兩孝廉各抱

第六

高節邑人請祀鄉校沈客子首倡兩俎詩邀和因次其韻

送元上人游廬山

題金聖歎詩牋

題鑒微上人折枝蔬果

京口阻風二首

同十八弟登金山

天門

登石鐘山

舟中不寐聞孤鴈哀鳴有感而作

馬當山阻風

補田婦詞二首

為笑嶧題黃葉老人詩卷

題賈黃州百石圖四十韻

楫堂索題秋林聽泉圖即以四字為韻各賦五言古詩十六

句

題竹林書屋冊

題碧川竹塢攤書圖

鄰犬剽平竹小燕二首

怪鴟

第十卷 古今詩三十六首

以武夷茶餉穗園穗園以葛粉見答因賦長句

送補山赴楚幕

盆蘭忽放同心並蒂二花各賦一律

余詠蘭二律同人和者甚衆聚緱謂與奇花寫照以不用仙

姝美女草木禽魚蟲豸相比者爲高因再各賦一律

題三緘齋

並蒂蘭

感而賦此

病後自遣用水村韻

寄調潛竹納姬三首

小池水深荷花至秋始盛賦此志

題畫二首

穗園以白石榴花索詩戲賦一律

醜舫老梧爲大風所摧枝葉零落

感

寄樊涇

自適

閉門和碧川韻

碧川疊前韻見贈走筆奉答

水村近詩手筆高妙顧猶深賞拙作此則歎芟之嗜也病後

無聊撫今追昔感慨以之因成五言古詩三十韻題倚晴

閣新稿之後

小園散步

晉民碧川過訪留飲小齋晉民有詩紀事即次原韻

疊前韻索碧川和

秋日偶成

立春日病體少蘇偶賦二律

笑崢以巨鯽二尾見贈口占奉謝

羅浮蝴蝶歌

晉民見和羅浮蝴蝶長歌一篇遠

勝拙作因取前詩未盡之意再成一歌

題雪夜問酒圖二首

題陸平仲小照二首

笛漁小稿目錄

笛漁小稿目錄

九 中華書局聚

碧川

開門和碧川韻

碧川尋前識見疑走筆

水時行詩手筆高妙極情深實拙作此則最要之詩也

此詩與今詩皆成以之而後五言古詩二十韻題的

翠竹樓上

晉氏碧川詩高妙小書言氏有詩紀事即次原韻

嚴前頌然得川和 秋行偶成

立春日病體少瘳為賦二律

笑歸以巨德之集身增口占

苦熱小辭百幾錄歌

晉氏見和羅浮蝴蝶長歌一篇

勝拙作因取前詩末意之意再成一歌

題詩夜同酒過二首

題詩平竹小照二首

笛漁小稿卷第一

秀水 朱昆田 西峻

西湖

水仙祠宇沒平蕪寶所山圍異給孤白塔亂堆歌舞地青山舊繞帝王都好風昨日又今日新漲外湖連裏湖安得六橋重插柳飛花徧撲酒家壚

登康山

五三六點社公雨二十四橋商女樓我上康山高處望鱗魚網已發瓜洲

劉撫軍席上咏珍珠泉二首

石家銑谷三斛漢苑金莖一盤可惜廉泉明瑟主人不愛珠官東西牆出復入大小波渟忽跳落花不知幾曲漂過明湖七橋

西厓歸自桂林訪予長水不值而去三首



詩人磨蠍是身宮到處相隨有五窮萬里歸尋雞黍約片帆真似馬  
牛風蠻煙瘴雨今無恙竹屋秧田恨未逢忽憶去年當此際吟情恰  
在兩湖中

手持秋卷哭黃埃君走浯溪我却回悵別忽驚雙歲換傷心不見尺

書來斷無巨手爲推轂獨有長鬚解愛才

西厓有老奴曰勤豐  
真蕭穎士之僕也

舟過

三湘沉楚糴定知弔屈有餘哀

千金散盡烏裘做一榻橫眠白日長我輩未能齊得喪俗人求備到  
文章平生碌碌輕餘子歲月堂堂歎幾將二頃若謀田負郭不教作  
賦擬前揚

寄魯松江

山村長日臥三椽生事蕭然絕可憐歲熟仍書求米帖市喧因想買  
山錢尋花借馬吟情健留客聽泉地主賢準擬中秋月圓候顛魚筐  
蟹醉深筵

次韻答蘅圃

遠夢漁竿投柘步石城三槩打春暮一笑欣辭沒馬塵歸向煙波伴  
鷗鷺長腰江米炊紅蓮大袖田衫裁白布易野直追羲炎民酸寒戲  
學島可句有時下帖招溪朋細君除釵付酒庫弄水競采芙蓉花結  
巢同醉海棠樹大戶分曹鬪酒兵小蠻隨地攜果具分湖圓柳恣還  
往細雨斜風何足懼馬棹紫蟹壯可釣桃莊黃雀肥堪捕上鄉水田  
足收割準擬開筵落場圃仙郎吟屐何時歸好傍梅花溪上駐結鄰  
莫忘往時約避俗要當如脫兔我行到處有杜鵑夢魂不踏天涯路

孤山拜林和靖墓

鶴語聲磨隔嶺村孤亭寂寂倚雲根一坏荒土埋詩骨幾樹野梅開  
墓門剩水殘山悲往事暗香疎影欲銷魂斜陽回望皆陳迹試覓漁  
樵與細論

寓昭招同西厓泛舟湖上得六絕句

湖雲湖雨移單櫂愁水愁風換夾衣除却顛狂二  
三子誰將眼具出城屏

茶籃酒榼攜菱角漁弟樵兄唱竹枝始悔紅塵長插脚十年纔得一

軒眉菱角香山童名

擘絮雲遮紅杏寺帶絲禽泊紫菱灣好景眼前誰畫得徐熙花鳥郭

熙山

山光水色尋常好看看到月明景愈奇瑪瑙坡前波浪闊水精丸湧碧

琉璃

數錢不用瀝春灰脫殼鵝兒瀉臘醅犯卯未醒人正勸楊梅如雪隔

江來白楊梅產蕭然山

月明風熟苻簷路飯細魚香菡萏天一片煙波拋不得牽船日日住

湖邊

抵舍三首

倦客歸三徑長貧薦七蔬但令巾有酒寧歎食無魚夢斷邯鄲枕閒  
乘轂鯨車故鄉風日好揮手謝嚴徐

瀉蕩圍溪面柴門縛樹身重招逃酒戶小醉落花晨倦以石爲枕狂  
憑草作茵我生百無用甘作太平民

似鳥初辭筴如駒乍脫銜謀生無上策託命只長鑱穀賤糧仍絕愁  
多酒未緘蕭然在鄉井終勝駕車帆

過演溪書屋

棋閣經牕倚亂坡春風隨意發高歌舍前舍後梅花放閒往閒來酒  
伴多古樣寬衫裁白麪新方小釀瀉紅螺日長無事須尋句第一先  
防熱客過

有感

深紅落盡只長吁十載相期計本迂咫尺花源迷徑路年時桃戶記  
根株溪邊枉結千絲網袖裏難尋一串珠幽恨欲消消不得擬將心

事付圓蒲

南亭至自清溪出示黑蝶齋近詞和演溪老人韻

庚申接月客京師長記挑燈夜雨時感舊最工長短句倦游還著苦  
辛詞氈衫席帽愁邊老鈿合金釵夢裏遺莫怪相看倍惆悵年來儂  
亦鬢成絲

南亭歸清溪久不至以詩招之

一艇清溪擁亂叢早將聲利付東波夢魂久矣名山約貧病兼之好  
事魔小屐幾時陪謝客嬌兒終歲倚鄒婆見香山詩洗車雨過秋身健掃  
漑軒牕待爾過

夏日村居二首

小溪新漲水泔泔竹傘芒屨自在行滿意插秧三寸雨連村煮繭十  
分晴郊童近喜無仇餉沮叟新來約耦耕早謝軟紅塵沒馬嬾將心  
力事浮名

隻雞斗酒話新桑得馬亡羊絕較量衰病何堪徒校走夢魂不羨甲  
科郎文章報國談何易貧賤驕人計本良坐哭行歌君莫怪世間原  
有接輿狂

初秋風雨兼旬南渚再過艸堂賦此志喜

往來盡放形骸外爾我原非勢利交把漿細撻淩葉路持杯同醉海  
棠巢荒涼病橘千頭種跌宕新詞十手抄籬角泥深無客過愛聽風  
雨響檐梢

小齋聽雨同南渚遠士分賦得蠶字

悲秋時節雨方酣自覺年來百未堪病久頭垂如中酒愁多心嬾似  
眠蠶滴殘千里初回夢點破三生靜裏參枕上魚經看已熟臨溪待  
結小圓菴

次演溪老人韻送南渚之白下

片帆又指莫愁村風物江鄉試一論紫鰕飛絲堪下箸黃甘落爪欲



開園別多作惡須清聖病不禁秋是太元髮神字太元見內景經寂寞湖邊三

畝宅籬根分井付空言

九月七日同遠士飲菘滕齋

定酒招強戶烹雞破小齋因為豪士飲笑脫隱居釵冒雨移亭菊尋

山貯蠟鞵故鄉重節近吹帽好相偕

題查客羅裙譜

紅絲小硯試煙丸鈿鏡朝朝對伯鸞解道羅裙新譜好曹家碑背記

會看

贈錢武子先生

先生七十鬢蒼然合在人間作地仙留客每沽深巷酒分題時聳夜

寒肩苦壑江外傳新法子蟹拌中疊小錢老去飛揚尚如許何須更

讀古苔篇

宿橫塘

淒斷更樓末尾聲烏篷七尺太愁生橫塘一夜風吹雨鄉夢如何作  
去聲得成

次韻答耕客衡圃

歲歲江南一解裝酒徒迎客小山旁病來猶倒三升榼醉後同眠六  
尺牀鉏菜幾時分瘦地又魚只合老寬鄉夜涼西北頻牽夢苦憶庭  
闈鬢欲霜

題衡圃西湖雨汎圖三首

自炊菘米煑香菰船尾長攜酒一壺此樂吳儂頻入夢算來真箇負  
西湖

梨花邨口雨愔愔裊裊魚絲一半沉記取他年支竹傘寶雲橫處約  
相尋

花南水北結湖莊雨過風吹蕩葉香冷境自來歸客少桃漿誰奠水  
仙王

次耕客韻卽送入都

三李君最貧連年走東西歸囊薄似葉一手能提攜社日哭慈母丁  
年悼賢妻數椽初卜宅信宿辭花谿江城住未久又蹋渾河堤帽裙  
風獵獵裘袂霜淒淒冷人趁熱官何異稻作壘大笑蒙莊子物我安  
能齊車亦具雙輪馬亦卓四蹄獨有落魄人周行多窮迷曉驛二十  
二膈膊荒山雞棗林覓草店北酒開餅泥旅枕歸夢濃定憶桃鄉犁  
卦爻畫平田棋局布方畦撥穀出苦口村尾朝朝啼吳農良可樂何  
必登金閨爲想耦耕暇折松代揮犀枯荷裹紅飯老節搜青藜南歸  
計若遂尺紙先緘題

再疊前韻送蘅圃入都

貧別真可哀月魄沉天西酸薄酒一杯臨行教重攜索去計亦得傭  
春對梁妻所以連夕夢夢必尋清谿歸興不可遏如決河之堤君車  
又將駕風鐸聲滄淒急雪打吟袖凍手掇橙壘勞舟發秦淮倦馬嘶

青齊肩經長安游祝歲操豚蹠回思紅蕩莊一逕荒煙迷春水浴花  
鴨秋燈鳴莎雞此景絕可愛芒屨衝吳泥勸買春耕犍搶雨同扶犁  
早種韭幾稜晚收芋半畦不如歸去好飽聽林鶻啼花機響迴織軋  
軋停深閨粲然發一笑笑齒明如犀人生行樂耳安用宵然藜唯當  
檢蕊書一一爲籤題

三疊前韻與蘅圃追話舊游

歲月如奔流一去不復西歎息十年內親串長分攜平生萬里游入  
不謀諸妻結交得龔五登涉窮山谿兩客舊燕館三過前隋堤酸寒  
帽擻耳哦詩聲淒淒求名等說餅欲速空吹壑嘈嘈雜竽音抱瑟徒  
干齊去來埃風中不惜羸馬蹠白日似夜行往往要路迷襤褸拳足  
驚咿啞斷尾雞春晚歸故園竹篙插蓮泥耦耕約沮叟同扶牛後犁  
夏稅望麥隴秋租登稻畦百指得一飽滿屋無飢啼竭來次畿曲訪  
道尋石閨薇省十日留痛飲黃支犀歸人捷于鳥土甑仍羹藜寄爾

村居圖一作驚蛇題

題蘅圃擔花圖二首

花擔春來慣款門尚留小墪護香根  
沉吟欲傍妝樓種絕勝歐家插  
畫盆

翦翦鮮風坼小苞捉團蝴蝶趁花梢  
山居要術如尋得種樹方應手  
自抄

題耕客行脚圖二首 并序

碧雞狂道士謂耕客是前世廬山種菜僧也  
耕客遂發願于十年之後重尋佳俗屬畫史  
寫行脚圖篆癸酉二字于瓢以志入山之期焉  
卯君顛顛坐詩飢 耕客小字卯君 笑著二生片佛衣  
燒硯舊曾煩畫史打包  
又欲問禪扉

蚪枝六尺挂楠榴夢裏各山恣意游  
遲我十年婚嫁畢去尋廬嶽舊  
園頭

梁溪華胥爲蘅圃寫僧裝小影侍以雙女一拈花一奉梵書  
取心經色空二語曰雙是戲題絕句

一雙天女玉差肩卑鉢羅花貝葉篇若使香門盡如此丁年儂亦願  
逃禪

遠士以玉狸見餉戲作長句

腐儒齒牙習藜藿久與梁肉成疎索三旬九食歎不飽漸看骨瘦頭  
圍削朝來食指動不已日午中庭啁乾鵲蔡子初自吳興來餉以玉  
狸涎已落老饕不暇計利害急命奪奴洗鐺杓細君搖手戒勿食驕  
兒挽鬚苦相攫箬包麵裹加糝蒸絕勝羊羔灌杏酪約升香飯炊吳  
杭夜闌飽送如填壑幾年夢想苕中遊至今未果扁舟約此行何難  
故踟躕食言屢矣寧無作青鞵布屨及早春與君同試游山脚  
喜晤辛齋菊隱樗菴二先生卽席分賦二首

迎寒尋舊雨入夜話鄉關埽榻竟須住抽帆未許還細傾官字盞



解旅人顏輸爾吟情健清才不可攀

土炕添薪火寒廳對雪天墨場甘袖手酒戶敢差肩歲暮嗟爲客家  
貧怯換年蟬連今夕語早見蠟花偏

過姊妹橋

十二樓空徧野苗女郎花發鬪嬌嬈舞衫歌扇銷磨盡孤負風流姊  
妹橋

清溪訪南亭

花深疑是避秦村映竹臨溪見笑痕破屋數閒堪送老晴山九點正  
當門秫田未買巾無酒菜圃初治芥有孫歸去南湖欣共載船頭落  
月已如盆

用王臨川贈曾南豐韻寄蘅圃

我交天下士龔子信奇最下視九州人聳身若登太萬里歎絕迹孤  
標出埃壘才大猶江湖細不擇畎澮辭吐春空雲態度何杳靄便便

十圍腹貯書如填厓高言盡新獲一一不可汰嗟予十年來隨風任  
漂沛結想山水間抽身塵土外此願久未果何異足受鉢乞食走四  
方山資向誰丐我狀劇可憐我意疇肯會抱玉鬻諸市作合苦無僧  
寅年到于今行人歲致禴唐風歎無衣杜陵歌有妹所幸同學中如  
子足倚賴歲時勤問遺菽雜金貝勸予學從軍勉力荷戈殺儻能  
立少功聖澤自汪濊焉知鍛翮鳥乘風已難翩逝同麋鹿游長林憩  
蕭蕭去來紅塵中寧能免狼狽生事殊悠悠天道亦昧昧長袖困短  
舞到處均無奈齊門遂吹竽越人竟滯滯俯仰逐時好口腹爲心害  
蹭蹬名場中否極不逢泰覽子迷懷作恍若聞清籟夜牕百迴讀燭  
盡復燃檜譬之飲露蟬迎風欲靈蛻我詩非大手自顧誠微蕞急思  
從子游舊學鉏荒艾去日一以多來日真足渴緬子北征時雨雪正  
滂霈千披縫狐裘衝寒蕩行軟煙霧埋江山瞻望眼迷眸回思武林  
春南北峯蒼藹吟身在輦轂歸志託渦瀨屈指上巳前定當返征旆

湖魚墜釣肥最好郎官膾酒軍遇詩敵彼此相磨蓋時時出銳師賴

有沈與蔡

謂沈南滄蔡遠士二子也

邾誠小國耳淺陋比曹鄴幸毋強凌弱請以

小事大執爻効前驅亦或挫利銳而子居中堅援桴惟視旌策勳詩  
早成清風響杉檜與其飽憂患何如具麤糲湖山放浪行永日弛巾  
帶雅集繼西園粉墨可圖繪

送樊谿之泰安

酌君以蓮花之酒贈君以竹節之鞭春陰漠漠泥路滑傷心早是迎  
梅天嗟予十載屢行役征衫著破芒屨穿長風驅沙騎北馬高浪駕  
屋乘南船往來萬里飽憂患白髮久矣抽蒼顛歸家一載謝人事竹  
牀蒲褥長高眠鄉里小兒肆嘲笑俗人與我原無緣惟君日日肯過  
從紅藤杖挂青銅錢認旗沽酒藉草飲脫略禮法無拘牽屈指曾無  
三日別坐必接席行差肩忽聞束裝走齊野雙淚迸落如春泉上巳  
後清明前風吹雨打花信歇南浦送君真可憐檣竿已插帆已挂相

看無語心茫然菖蒲酒熟紅榴發待爾同開解粳筵

笛漁小稿卷第一



笛漁小稿卷第二

秀水 朱昆田 西峻

得畊客都下書云首夏歸桃鄉喜而賦此

去歲送君桃葉渡紛紛雨雪江城暮今歲憶君梅花谿落紅如雨成  
春泥一春飽聽雞頭鶻爲怕愁多睡連月陌上開殘似面花水邊不  
見湔裙韞桃鄉寂寂無人煙古水百折流涓涓吳牛兩具犁兩架結  
鄰並蓋茆三椽萬里知君遊已倦逃名舊日曾燒硯試思紅塵插汗  
脚何如白水釣線朝來門外傳素書發函伸紙心顏舒書言南歸  
計已決春尾定得栖林廬牛車曉出青門道拄杖無邊堪寄傲不將  
澹面對公卿只辦清樽共傾倒春山筍蕨如蜜甜朱藤百尺繁花黏  
人間富貴何足數吟興從教日日添

出門示遠士

年來乞食走連連一飽何由謝俗纏懷刺復游鎗脚郡載書止借櫬



頭船半家寒骨愁無賴幾緗芒屨著屢穿安得與君尋舊約租牛同種上鄉田

過白蓮寺

梓樹花開講寺門琉璃照殿晝昏昏牆邊古佛存泥骨壁上番書滅漏痕入社詩篇同隔世故人墓木走長根淒涼舊事憑誰說翦紙難招散客魂

亡友沈武功讀書寺中今十五年矣

萬安橋候潮

華亭昔載秀州版相依有若齒與唇一從行省畫江浙民分壤錯猶為鄰我來破荒始辛酉於今三度浮輕輪萬安橋邊水似箭憂心繹繹蠶抽綸船頭拽篷尾捩柁撐柱復用雙篙人奔流不受兩岸束其勢桀驚來無垠客舟到此每小泊偃杠且復留逡巡自潮始生候潮落日影過午還加申十五年來走萬里不測屢涉魚龍津沙頭長跼謝河伯菽夾再拜祠江神前年高郵湖水決堤口百道如鎔銀舟師

歌笑一不戒幾與川后爲編民當其痛定乃知痛垂堂之訓非無因  
所願衣食得麤足三椽一席寧棲貧尋常不出數里外牛背穩臥行  
何物未須切切愁行路長作江鄉自在身

魯松江餉鮓魚

楊花落後到江鄉脫網鮓魚白似霜馬上裹冰初入貢雨中穿柳忽  
分將行廚亦解和鱗煮緩帶先拚恣意嘗太守新來招一戶官齋直  
欲醉千場

競渡歌

白龍潭圓如鏡年年五月龍舟競市上紛紛走少年未到五月先斂  
錢今年龍舟更加樣擔酒椎牛集丁壯競兒醉飽笑豢龍一一乘潮  
能趁漲五月五日天氣晴空城倒巷奔吳僮人頭戢戢如束筍人聲  
隱隱如飛蚊或聚如鬪蟻或散如驚麀朱樓臨水簾半開紅牕小舫  
連翩來盤雲髻滑金釵溜窄袖衫輕白苧裁琥珀光傾大小盃定州

珍做宋版印  
瓷盤出冰綬命縷新纏五色絲香蘆小裹九子糗醉眼爭看日端午  
春雷填填聞打鼓龍頭卷晴波龍尾攬素浪吳綾翦作旗蜀錦裁爲  
障競兒把槳各竦聽疾徐恰與鼓聲應鼓聲徐輕擗緩棹閒以舒鼓  
聲疾長招斡波無一失忽然趁勢眠水中似欲入水尋龍宮四圍觀  
者盡失色蹶然而起何其雄亦有好事者買鴨投龍潭鴨頭乍沒水  
羣龍爭來擣標竿一丈船心轟直上竿頭齊詫速斜懸倒挂比獏獠  
橫身更以竿摩腹復有快船紛如麻名爲護龍森矛又茸城俠少好  
身手各逞長技交相誇須臾日落龍舟卸細柳纏頭口瘖瘞舟沉野  
港人始散我聞此俗尤堪詫此俗江湖傳已舊淫風最是吳人狂枯  
槁忠臣不可招婆婆少女安能救今春連月雨不收大小麥子皆無  
秋急宜插秧向田頭何爲輟耒事嬉游當年元江陵作詩諷競舟岳  
陽刺史賢百舟一不留我作此詩非夸稱亦欲竊比元江陵

題荷包牡丹

小包輕縷蹙紅羅一一緘愁貯恨多籬落自憐顏色好人間姚左待如何

題槎客畫扇二首

滿槽春水漲蒲萄浪闊波肥駕小舸記得天門山下路江魚如雪鱠

蘆刀

歸向漁村作釣徒湖田幾稜足支吾黏天高浪魂猶悸愁見江南萬

里圖

飲心在齋分得花字

每嗟相見似團沙卯飲渾忘到日斜未肯逢人輸酒戶不愁受病在

脾家倚聲欲和短長句

陳子允文出杜丹花詞甚工

乞畫定須凹凸花

張僧繇畫花遠視作

凹凸狀近看却平曹子十經頗得是訣

西郭還扶殘醉去迎神隊裏逐鈿車

蘅圃寄竹根杯

朱生飲家稱小戶終日多不過三蕉性雖不飲喜人飲愁壘每借生

春澆傾家一釀一百斛  
觥船斗醖羅深宵酒徒醉  
眠若魚貫快意寧顧家人  
枵今年一貧不可奈種種  
已爲官租銷官哥汝定不  
可得無錢更買宣皇窯景  
德新瓷價亦貴鬪雞舊樣  
仍輕描楠瘤杉癭但臃腫  
椰瓢楷節非堅牢吾鄉匏  
卮最晚出五峯死後魂難  
招每因酒事覓酒具牀頭  
但有顏生瓢龔五知予嗜  
奇最竹根十節精鏤雕或  
作折枝垂果實或作細草  
抽苗條或于古藤竄鼯鼯  
或于叢棘棲鷓鷯秋蟲一  
一列瑣細恍若趨趨還嚶  
嚶水邊老屋足幽趣松牀  
菌枕同香寮此杯雅與野  
人稱吾師蓑友分頭邀銀  
杯羽化何須惜長把荒齋  
破寂寥

落帆亭

又攜書卷走風塵  
錄別誰行酒一巡  
惟有落帆亭畔柳  
尙將青眼送愁人

和遠士無題六首

每嗟相見太匆匆一片紅牋恨未通幾向小梯行細步爲憐宋玉在  
牆東

細細輕裙薄薄衣斷人腸處總依稀温幃願結交加夢化作雙雙蝴蝶飛

燕釵新綴小於菟五色絲纏八角符午日龍舟看勝會者番拋却繡工夫

幾日無心奉阿婆密書草草背人題書成最恨無青鳥獨上南樓帶粉啼

匆匆過盡可憐春收淚還將粉臉勻鏡裏但留顏色在他時好作比肩人

小股平分九子釵雙飛願作並頭鬆如何抵死催人去悵斷長安十二街

題聲山仗劍圖



查生讀書如破竹查生飲酒如淋灰撐腸何止五千卷空腹一倒三百杯好色亦如書與酒空中延想珊瑚釵圓珠三斛安可得只憑畫史爲良媒羅帶細細衫葉葉玲瓏小髻梳慵來阮琴一張錦爲襍澀劍一把銅生苔有時嫣然出秀句紅絲片石生光煤酒邊記曲喚娘子歌容宛轉聲徐徊人生如此足快意安用九陌衝黃埃

京口阻風

江燕風中飛江豚浪中舞瓜洲對蒜山有檝不敢鼓久知踏浪危不若歸踏土飢復來驅人歎息貧士苦

露筋祠

水面紛飛豹脚蚊荒祠寂寂倚湖垠高舸滿載西江女猶復含羞說露筋

寶應

八寶湖中水聲同萬馬奔浪高城岌岌堤滑雨昏昏人以魚爲飯家

惟茲作門十年昏墊苦有口向誰論

題東川先生讀書秋樹根圖

秋山骨峻嶒秋水流浹渌西風烏柏樹冉冉舞紅蝶境冷人不爭日  
與空翠接先生乞假歸東湖清泉白石無處無由拳自昔讀書地一  
峯老人曾作圖

題明妃出塞圖

馬上琵琶聲最悲漢宮無復有蛾眉丹青不是汚顏色爲乏金錢買  
畫師

送客子歸平湖

張斷家山未得歸深秋作客計全非霜楓落後烏菱老秔稻熟時黃  
雀肥小榼三升傾別酒新絲一稱補征衣輕鞭短鐙輸君決冷夢空  
尋舊釣磯

和題硯溪紅豆書齋五首

幾束荒茅縛作亭，  
笆籬宛轉勝雲屏。  
更添小閣疎花外，  
恰對何山九朵青。

早稻收時堆滿門，  
齊民要術篋中存。  
閒田幾稜舍南北，  
不讓西風碌磚邨。

吾家爰史兩山東，  
小小莊窠與此同。  
細雨衝泥跨秧馬，  
肥波射鴨把桃弓。

硯溪小隱吾曾到，  
紅豆書齋亦再過。  
城市山林俱秀絕，  
不歸君意欲如何。

經義紛紛井大春，  
每聞妙解脫陳塵。  
一塵舊有葑門宅，  
擬作亭前問字人。

珍珠泉

中丞官舍第三泉，  
水面跳珠顆顆圓。  
小舫不妨牽岸上，  
羣山無限落亭前。  
舊游欲說還同夢，  
勝地重過合是緣。  
十七年來成底事，  
鬢絲如

許實堪憐

張上舍盛誇亳州牡丹遠過洛下因賦十絕以紀且訂探花之約焉

洛下家家種牡丹歐陽小譜舊曾看年來寂寞花王國譙邑春風綻滿闌

好種曾誇九十餘花各記得小屏書若於雙桂堂邊見雙桂樓中也

不如樓上舍所居曰雙桂堂錢思公於雙桂樓小屏上載牡丹佳者凡九十餘種

花外春春列小筵每因客到興尤顛待尋穀雨前頭約日下又頭百

个錢

天生花葉出尋常一朵傾城插晚妝好似玉環微醉後沉香亭下舞

霓裳太真晚妝毫花之上品也

小小燕支染玉盤徐熙崔白畫應難虛黃夜點宮人臂莫作楊家一

捻看花色如玉有丹砂一點著於瓣上每花一點每點不同土人謂之燕支點玉

輕紅淺綠破天慳無限名花盡貶顏淳化街頭新樣好春游不上大

房山綠牡丹惟大房山有之亳州新產綠水紅蓮其色尤奇

姚左紛紛未足論支紅孟白變陳根不妨數十千錢買池館栽看到

子孫支紅孟白皆花品之佳者

斬新瑤朵出僧區月下看來色似無試比白家花更好不須爭賞玉

盤盃健上人種花色如雲母土人謂之健白

新來學得漿花法欲把千株種廣陵他日紅橋傳勝事不教芍藥數

龍興翦牡丹嫩條和熟土封裹謂之漿花上舍欲以是法移千本於廣陵

梅花溪上徑三三歸夢濃于酒半酣見說接花開亦好與君分種種

江南

晚步泉上

難得人生十日閒行吟頓覺旅愁刪珠跳的的泉中水螺擁層層郭  
外山魚檻坐看長線裊石橋望斷小門關狂思弄水偷船去北渚亭

邊一往還

次止淵病起二首

又作齊東客來看歷下山論文得同調終日話鄉關藥物非容易詩  
篇賴往還朝來成健起吟卷待君刪

文章乖俗尙丘壑寄吾情窮鳥初成賦閒鷗舊結盟新愁來似瘡歸  
夢重於醒幸有鄉門老新詩照眼明

夜夢

夜夢不知遠忽然侍庭闈父兮課我書母兮攬我衣怪我書去手憐  
我衣減圍愁多學易荒客久身不肥語我懸望切何爲音信稀哽咽  
欲置對急雪敲牕扉覺來淚飄枕殘燈寒無輝

詠史二首

瓠子秋風信手裁須知漢武是雄才侍臣縱有枚皋在一字如何代  
得來



見說三神路渺茫歲星偏愛近君王若非龔識神仙字那得長爲漢  
侍郎

始置提魚書病風氣覺來或臨林飲酒寒無聊

笛漁小稿卷第二

長安客久食不眠醉吟纔盡世所爲音韻辨與因

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半

文章不味空吟然詩與聞父令時非書世不覺非死對非書云半